

# Samu Na Finki

## Mpeve-Santu Xupesamaka?

 Beno me mona, Mpangi Neville ke kwikilaka na kutentika maboko.

Mu ke mona ti mu kele na mwa bakyuvu. Ntangu yayi, mu ke baka yawu mbasi na nkokila, samu ti mu kele na ntangu ve ya kutala yawu na nkokila yayi samu na beno, mu banza na nkokila ya nsuka ya Nsangu. Ntangu yayi, kana muntu ke na kyuvu samu na mosi ya Nsangu, beno tula kaka yawu na zulu awa na nkokila mosi, mpe mu lenda baka yawu nkokila yina ke landa.

<sup>2</sup> Ntangu yayi, mbasi na nkokila mu ke zola kutala, to kuzwa, na kisika, mwa balongi, kana ya lendaka salama; kana ve, mwa ya mbote, ya babakala to bakento yina beto lendaka bokila na ntangu ya mfunu, na kisika . . .

Mbasi na nkokila beto ke banda, na manima ya Nsangu, na kutentika maboko, mpe, samu na Mpeve-Santu. Mpe na manima, ya ke vwanda . . . Beno ke na muswa ya kuvwanda kaka awa kana beno zola, ntangu nyonso ya bakonze, kana ya ke baka ntangu nyonso yina na kufwa. Mpe na manima—na manima, kana ve, kana beno zola kukwenda na yinzo ya beno, mbote, beto ke sepela, kana beno kuma na kisika beno . . . Beno zaba kaka ya kisika ya kukwenda . . .

Beto zola kuzwa mwa balongi, banumelo ya bawu, kana bawu kele banzenza; banumelo ya bawu, kisika bawu ke na kuvwandaka, ti kisika beto lenda kuzwa bawu na mbangu; mpe kuzwa mosi na yinzo mosi, mosi na yinzo yankaka, mpe mosi na yankaka, samu ti bawu pesa beno malongi, beno yina ke sosa lusakumunu ya nene yayi yina beto ke na kuzonzila, mbotika ya Mpeve-Santu.

<sup>3</sup> Mazono na nkokila beto vwanda zonzila, “yinki Yawu vwandaka.” *Yinki Vwandaka Mpeve-Santu?* Mpe beto talaka Yawu kuvwanda kaka nyonso, yina Nzambi silaka na beto. Uh-huh. Na kati ya Yawu beto talaka kaka yina Dibuundu ya Nzambi ke vwanda na nsatu. Beto talaka Yawu kuvwanda kidimbu, Kisadisi, kupema, mpe kyese, mpe ngemba, mpe mvumbukulu ya lufwa. Mpe nyonso yina Nzambi silaka na Dibuundu ya Yandi, kele na kati ya Mpeve-Santu.

<sup>4</sup> Mpe ntangu yayi, na nkokila yayi, beto zola kulonga, to kuzonzila, kulongisa . . . Mu ke na bapapier tatu to yiya ya bisono awa, to Masonuku, na zulu ya Yawu, na yina . . . Mazono na nkokila mu bikaka Concordance ya munu ya Cruden’s awa, mpe mu bakaka yawu ve. Mpe mu vwanda me sala kaka nyonso mu

lendaka bubu yayi na Masonuku. Ntangu yayi, mpe mbasi. . . Na nkokila yayi beto ke longu na: *Yinki Vwandaka Lukanu Ya Nzambi Na Kufidisa Mpeve-Santu?* Samu na yinki Yawu kele? Kana Yawu kele kima ya nene, na yina samu na yinki Nzambi fidisaka Yawu?

<sup>5</sup> Na yina, mbasi na nkokila beto zola kuzonzila na: *Yawu kele samu na Beno?* mpe *Yinki Mutindu Ya Kuzwa Yawu?* mpe *Yinki Mutindu Beno Ke Zaba Ntangu Beno Kele Na Yawu?*

Mpe kuna, na manima beto me tala yawu, na Masonuku, kubangula yawu na nzila ya Masonuku, na kubakaka Masonuku na nyonso, na manima bayina ke na kusosa Mpeve-Santu ke belama kuna. Mpe kuna mu ke na kivuvu ti reveil ke landila, katuka kuna, samu na kulandila kuna na Mpeve-Santu.

<sup>6</sup> Ntangu yayi, yina na kuvwandaka mbasi na nkokila bantu mingi lendaka vwanda mwa ntangu fyoti na bivinga na kati ya dibuundu, mu ke na kutala kana beto lendaka kuzwa balongi mingi mpe bantu yina yina kele ya kutesa na kutwadisa bantu na kuzwa Mpeve-Santu, samu na kupesa bawu ngolo, kukwenda na yinzo na kento mpe bakala ya yandi, to—to na muntu yina ke na kusosa Mpeve-Santu, yina longukaka mbote yinki ya kusala.

Kana beno zola kaka kupesa numelo ya beno ya alo-alo to adrese na pasteur, na nkokila yayi to mbasi na nkokila. Beno pesa kaka yawu na Mpangi Neville, kuna yina ke sala beto kuzwa lukutakanu yankaka ve. Beno pesa kaka numelo ya beno ya alo-alo kisika beto lenda kuzwa beno. Mpe kuna beno tuba, “Mu ke kubama, mpe kana beto. . . beno zola kutula munu na yinzo mosi.” Kana ya kele kento yandi mosi, kuna beto lenda fidisa kento, beno me mona, na kento yayi. Mpe kuna, kana ya kele na yinzo kisika ya kele bakala na kento ya yandi, mbote, beto lenda fidisa longi.

Mpe beto ke na kyese na kuzwa beno kusala kintwadi, samu ti mu zaba ti beno, muntu nyonso, kele na ntima na yayi, yayi kele na luvalu mingi. Mpe beno bambuka moyo, “Yandi yina ke vuukisa moyo na kukatuka kifu ya yandi, me fika masumu mingi.” Beno me mona? Mpe Kento ya dikwela ya Klisto kele na nsatu mpe mpwila. Yandi kele na kati ya misongo, samu na kubuta bana ya Nzambi.

<sup>7</sup> Mpe ntangu yayi, na nkokila yayi, ntete beto tanga Masonuku, bika beto kulumusa bayintu ya beto mwa ntangu fyoti samu na bisambu. Mpe ntete kaka beto sambila, beno na bayintu ya kukulumusa, beno ke na lombilu? Beno telemisa kaka maboko ya beno mpe beno tuba, “Nzambi, munu mosi me telemisa maboko ya munu. Mu ke na nsatu. Mu ke sambila ti Nge kusadisa munu, O Mfumu.” Nzambi kusakumuna mosi na mosi ya beno. Yandi ke na kumona maboko ya beno. Bawanzio me baka na noti bandombolo ya bawu.

<sup>8</sup> Mpe, Tata ya Mazulu, beto me kwiza ntangu yayi, na kubelamaka dyaka na Nge na bisambu. Yina, kukondwa ntembe ti bisambu kusalamaka yimeni na kati-kati ya bana ya Nzambi na nkokila yayi, na mwa kisika yayi, mpe ti bankunga vwandaka me yimbama, mpe beto vwandaka me zangula bantima na kumonisaka kyese na balukumu ya Nzambi.

<sup>9</sup> David tubaka yandi ke kota na dibuundu ya basantu mpe ke sala balombilu ya yandi kuzabana. Mpe na nkokila yayi, ya me vwanda na maboko mingi. Na kutala, mu banza, mu lenda tuba, makumi nana na zulu ya nkama ya bayina kele ya kuvwanda na kati ya yinzo yayi na nkokila yayi me telemisa maboko ya bawu samu na balombilu. Ya ke lakisa, Mfumu, ti beto lenda kaka ve kukwenda kukondwa Nge. Beto fwana kuzwa Nge, kilumbu na manima ya kilumbu. Nge kele Luzingu ya beto, kyese ya beto, mavimpi ya beto, ngolo yina ke simbidilaka beto, kisika ya beto ya kutelama, kinkuti ya beto ya kisengo, kinkuti ya beto ya kisengo na ntwala ya mbeni.

Mpe beto ke lenda kaka ve kunwana mvita yayi ya luzingu kukondwa Nge. Ya lenda salama ve na mutindu nyonso samu na beto na kusala yawu, mpe beto fwana na mutindu nyonso kutala na Nge. Samu, beto zaba ti beto ke na kutambulaka na ntoto ya mpimpa mpe ya kitombe. Na bisika nyonso mbeni me zungudila beto, na kutulaka mabaku mpe mitambu. Banzila ya beto, Mfumu, kele ya kufuluka na mitambu ya mbeni, samu na kutalisa beto mpasi.

<sup>10</sup> Mpe beto, mpe, zaba, na nsuka ya nzila beto fwana sabuka dibengi ya yinda, ya ndombe yina ba ke bokilaka lufwa. O Mfumu, nani ke simba maboko ya beto kuna? Beto zola kuzaba Nge ntangu yayi, Mfumu. Beto zola kuzaba ti Nge kele ya kusimba maboko ya beto, mpe beto ya kusimba diboko ya Nge, ti beto lenda vwanda na kivuvu ya kukangama ngwi yina ti ntangu beto ke kuma na ntangu ya nene ya nsuka yango ya luzingu ya beto, na kukota na mwelo yina ba ke bokilaka lufwa, ti beto lenda tuba na santu ya ntama, “Mu zaba Yandi na ngolo ya Yandi ya mvumbukulu na lufwa, mpe mu zaba ti ntangu Yandi ke bokila, mu ke basika na kati-kati ya mafwa.”

<sup>11</sup> Ntangu yayi, Tata Nzambi, beto ke sambila ti Nge kusakumuna bandombolo ya beto mpe kuvukana ya beto. Sakumuna Mambu ya Nge. Mpe kana mu zolaka tuba kima yina lendaka vwanda ya kuswaswana na Ndinga ya Nge to luzolo ya Nge, Nge ke dyaka na ngolo ya kukanga yinwa, mutindu Nge salaka na dibulu ya bankosi ntangu Daniel vwandaka. Mpe beto ke sambila, Mfumu, ti Nge ke fungula makutu mpe bantima na nkokila yayi, ti, mpe kusala na kati ya bawu nsatu mpe mpwila. Ti bawu vwanda na mpwila mingi ti bawu kulenda ve na kulala to na kupema, ata kisika ve, kana tii Kisadisi ke kwiza.

<sup>12</sup> Beto ke kwikila ti beto ke na kuzinga na bilumbu ya nsuka, na kinsinsya ya Nkwizulu ya Yandi. Mpe ya kele samu na yina Bansangu yayi kele ya kutwadisa, Mfumu. Ya kele samu na bantu na kuyilama, na kusala keba. Mpe ti, na nkokila yayi, beto katula kaka mpusu, malu-malu yayi, ti beto kutula yawu na lweka ya kiti, kutuba, “Mfumu Nzambi, mu kele muntu yina ke kuzwaka na Nge. Ti Mpeve ya Nge kulosama na munu. Yidika munu mpe sala munu na manima ya luzolo ya Nge. Mu ke bika ntima ya munu, ngolo ya munu, nyonso ya munu, na dyambu ya Nge.

<sup>13</sup> Kuwa beto, Mfumu. Beto kele awa ve samu ti ba mona beto, na nkokila yayi yina mvula ke na kunoka. Beto kele awa ve samu kaka ti kisika yankaka ya kukwenda kele ve. Beto kele awa samu na lukanu mosi ya kieleka, ya kusakumuna, ya santu na bantima ya beto, yina kele, kubelama na Nge, na kuzabaka ti Nge silaka kana beto belama na Nge, Nge ke belama na beto. Mpe ya kele samu na yina beto kele awa. Yandi yina me kwiza na nsatu ke vutuka ve na nsatu. “Kyese na bayina kele na nsatu mpe mpwila ya ludedomo,” tubaka Yesu, “samu ti bawu ke vwanda ya kufuluka.” Mpe kana beto lomba dimpa, beto ke kuzwa ve ditadi. Beto ke na kivuvu yina. Mpe kana beto lomba mbsi, beto ke kuzwa ve nyoka. Kasi, Nzambi Tata ya beto ke dikisa beto na Mana ya Mazulu, Ndinga ya Yandi mpe Mpeve ya Yandi yina ke pesaka kimbangi ya Yandi. Pesa mvutu na balusambulu ya beto, Mfumu, mpe bandombolo ya beto, na yina beto ke na kulandila na kuingila na Nge. Na Nkumbu ya Yesu Klisto beto me sambila. Amen.

<sup>14</sup> Ntangu yayi, beno bayina ke na kubumbaka na kusonikaka Masonuku yayi, kana beno zola kuluta dyaka na munu na Santu Jean, kapu 14. Beto zola kubanda na kapu ya 14 ya Santu Jean. Mpe beto banda na kutala na nzila ya 14, Santu Jean 14:14, mpe kutanga kaka ndambu ya Masonuku yayi. Ntangu yayi, na kati ya yayi beno ke tala dibanza ya kulutila ya yina mu zola kuzonzila na nkokila yayi.

<sup>15</sup> Mpe beno bambuka moyo, beno bayina kele na Babiblia ya bisono ya mbwaki, ya kele na mbwaki, yayi. Ya kele Mambu yina Yesu Yandi mosi kuzonzaka, na yawu kuna beto lenda pema na kivuvu ti ya ke vwanda kaka mutindu Yandi tubaka. “Mazulu mpe ntoto ke luta, kasi Ndinga ya Yandi ke kondwa ata fyoti ve.”

Ntangu yayi beto ke tanga katuka nzila ya 14 ya kapu 14.

*Kana beno lomba kima na nkumbu ya munu, mu ke sala yawu.*

Wapi mutindu ya nsilulu ya kusakumuna!

*Kana beno zola munu, beno ke kangama na misiku ya munu.*

*Mpe mu ke lomba na Tata, na kufidisa beno Kisadisi yankaka, yina ke vwanda na beno ntangu nyonso;*

*Mpe Mpeve ya kieleka; yina bantu ya yinza lenda kuyamba ve, samu ti bawu lenda kutala yandi ve, . . .*

Ntangu yayi, beno bayina ke tanga na Biblia ya Grec, ke mona yawu na kati kuna, ve. . . *Kutala ya zola kutuba “kubakula.” “Samu ti yinza ke bakula Yandi ve.”* Yina kele kieleka mingi. Bika mu tanga yawu mbala mosi dyaka ntangu yayi.

*Mpe Mpeve ya kieleka; yina . . . kieleka; yina bantu ya yinza lenda kuyamba ve, samu ti bawu lenda kutala yandi ve, mpe kuzaba yandi ve: kasi beno zaba yandi (nani? Kisadisi); samu ti yandi ke zingaka na beno ntangu yayi (na ntangu ya bubu yayi), . . . yandi ke zingaka na beno, mpe ke vwanda na kati ya beno.*

Yinki Yawu kele? Kisadisi mosi yina.

*Mu ke bika beno bansiona ve: Mu . . .*

Muntu nyonso zaba ti “Mu” kele kiyingilu ya muntu.

*. . . Mu ke kwiza na beno.*

*Dyaka ntangu fyoti, mpe yinza ke mona dyaka munu ve; kasi beno ke . . . kasi beno ke mona munu: samu ti mu kele ya moyo, beno mpe ke vwanda moyo.*

*Na kilumbu yina beno ke zaba ti mu kele na kati ya Tata ya munu; mpe beno na kati ya munu, mpe mu kele na kati ya beno.*

Ya kele kuna ke vwanda kati-kati ya dibanza ya munu, kasi beto ke tanga mwa ntama dyaka. Bika mpe mu tanga yawu dyaka, ntangu yayi.

*Na kilumbu yina (kilumbu ya nene, kilumbu ya lusambusu), kilumbu yina beno ke zaba ti mu kele na kati ya Tata, mpe beno na kati ya munu, mpe munu na kati ya beno.*

*Yandi yina ke na musiku ya munu, mpe ke kangama na yawu, yandi kele yina zola munu: mpe yandi yina ke zola munu ke vwanda ya kuzola na Tata ya munu, mpe mu ke zola yandi, mpe ke talana na yandi.*

*Judas yina kele ve Judas Iscariot, tubaka na yandi, Mfumu, wapi mutindu ti nge ke talana nge mosi na beto, kasi na yinza ve?*

Yina kele, *kosmos*, “mutindu ya yinza ya kubongisa.” Kana beno kele na noti na lweka kuna, beno ke tala. Na munu ya kele “g,” mpe ya me tuba na lweka awa, “*kosmos*, to mutindu ya kusala ya yinza.” Yina kele mabuundu, mpe nyonso yina, beno me mona.

*. . . yinki mutindu ti nge ke talana nge mosi na beto, mpe ve na bawu? Yinki mutindu Nge lenda sala yawu?*

*Yesu vutulaka mpe tubaka na yandi, Kana muntu zola munu, yandi ke kangama na bandinga ya munu: (amen) mpe Tata ya munu ke zola yandi, mpe beto ke kwiza na yandi, mpe beto ke zinga na yandi.*

*Yandi yina ke zolaka munu ve ke kangama na bandinga ya munu ve: . . .*

Lendaka kangama na mambu ya dibuundu; kasi kukangama na mambu ya Yandi, beno me mona.

*. . . mpe bandinga yina beno ke na kuwa kele ya munu ve, kasi ya Tata yina fidisaka munu.*

*Mu ke na kuzabisa beno mambu yayi, ntangu mu ke ntete na beno.*

*Kasi Kisadisi, Mpeve-Santu, yina Tata ke fidisa na nkumbu ya munu, yandi ke longisa beno mambu nyonso, mpe ke bambula beno moyo, na mambu nyonso yayi (yina kele, Badinga ya Yandi) yina mu ke na kuzabisaka beno.*

Na yina na wapi lukanu Nzambi fidisaka Mpeve-Santu? Ti Yandi bwela balusakumunu ya Yandi na Ndinga ya Yandi.

<sup>16</sup> Yesu tubaka, ti, “Na kilumbu yina beno ke zaba ti Mu kele na kati ya Tata, mpe Tata kele na kati ya Munu; mpe beno kele. . . Mu kele na kati ya beno, mpe beno na kati ya Munu.” Ntangu yayi, kana beto zolaka kutuba yayi. . .

<sup>17</sup> Ntangu yayi, beno bambuka moyo, yayi ke vwanda na bande.

Muntu mosi ya mumbungu ya Muklisto, ya Louisville, bokilaka munu ntama mingi ve. Mpe yandi tubaka, “Ya kele mawa, Billy, ti Bansangu yayi, mutindu yina nge tubaka mazono na nkokila, ke kuma na mafunda makumi yiya ya bantu ve awa na kisika ya nkama mosi na makumi tanu, to bankama zole, bankama tatu ya bantu na mwa tabernacle ya nge.”

<sup>18</sup> Mu tubaka, “Tata, na bangonda sambanu katuka ntangu yayi, kana Yesu vutula bilumbu, yinza ya muvimba bisika nyonso ke kuwa yayi.” Beno me mona?

Babande yayi ke kwendaka bisika nyonso na yinza, beno me mona, bisika nyonso. Mpe, na yawu, beto ke na kulongisaka awa ntangu yayi yina kaka beto ke kwikilaka kele Kieleka, mpe yina beto me tala ti Nzambi me siamisa yawu na beto na kuvwanda Kieleka.

<sup>19</sup> Ntangu yayi, lukanu, yinki vwandaka—yinki vwandaka lukanu ya Nzambi na kufidisa Mpeve-Santu? Ntangu yayi, mu ke sonikaka yawu, Jean 14, kubanda na nzila ya 14, mpe kulandila kutanga kapu, samu na fondasio. Lukanu ya Nzambi, beto me tala awa, na kufidisaka Mpeve-Santu, vwandaka lukanu mosi, ti

Nzambi Yandi mosi zolaka zinga na kati ya Dibuundu ya Yandi mpe kulandila manaka ya Yandi na nzila ya Dibuundu.

Ti, Nzambi vwandaka na kati ya Klisto, na kulandilaka manaka ya Yandi na nzila ya Klisto; na Klisto, na kati ya Dibuundu, na kulandilaka kisalu ya Yandi na nzila ya Dibuundu.

<sup>20</sup> Ntangu yayi, beto zaba yinki Mpeve-Santu kele. Beto me tala, mazono na nkokila, ti Yawu kele Nzambi.

Ntangu yayi, ntangu beto ke banza na Nzambi, Tata, mutindu Yesu kuzonzaka awa, Tata ya Yandi; Nzambi, Mwana, mutindu Yesu; Nzambi, Mpeve-Santu, mutindu yina beto ke bokila Yawu bubu yayi, ntangu yayi, yina zola kutuba ve ti ya kele na Banzambi tatu ya kukabuka, mosi mosi mosi. Ya zola kutuba ti ya kele na Nzambi mosi na kati ya bisalu tatu.

Ti beto tuba yawu mutindu yayi. Nyonso yina Nzambi vwandaka, Yandi tsyamunaka na kati ya Klisto, samu ti Yandi kumaka mpamba Yandi mosi mpe tsyamunaka Yawu na kati ya Klisto. “Mpe Klisto vwandaka kufuluka ya Kinzambi kati na nzutu.” Nyonso yina Yehovah vwandaka, Yandi tsyamunaka na kati ya Klisto.

Mpe nyonso yina Klisto vwandaka, Yandi tsyamunaka na kati ya Dibuundu; na kati ya muntu mosi ve, kasi na kati ya Nzutu nyonso. Na yina, ntangu beto ke kwizaka kintwadi na kimosi, beto ke na Ngolo. Nyonso yina Nzambi vwandaka, vwandaka na kati ya Klisto; mpe nyonso yina vwandaka Klisto, kele na kati ya beno.

“Samu ti Nzambi kumaka nsuni, mpe zingaka na kati-kati ya beto.” Ya Ntete ya Timothée 3:16, kana beno ke na kusonika yawu, “Kukondwa ntembe nene kele dinsweki ya kinzambi: Nzambi kutalanaka na nsuni, mpe beto simbaka Yandi. Nzambi, Yehowa, kumaka nsuni, mpe tambulaka na zulu ya ntoto, mpe beto monaka Yandi na meso ya beto.”

<sup>21</sup> Beno zaba, na kapu yina kaka, ya Jean 14, Philippe tubaka, “Mfumu, lakisa beto Tata, mpe yina ke lunga na beto.”

<sup>22</sup> Yesu tubaka, “Mu kele na beno katuka ntama, Philippe, mpe nge zaba Munu ve? Ntangu nge me mona Munu, nge me mona Tata. Mpe samu na yinki nge ke tuba na Munu, ‘Lakisa beto Tata?’” Nzambi kumaka nsuni.

<sup>23</sup> Ntangu yayi yawu yayi. Tata vwandaka Nzambi na zulu ya beno, beto ke tubaka. Beto kele katuka Adam. Nzambi, Tata, vwandaka na zulu ya Moïse mpe bana ya Israël, na Dikunzi ya Tiya. Na manima, Nzambi na beto, na kati ya Klisto; tambulaka na beto, zonzaka na beto, dyaka na beto, lalaka na beto. Nzambi na zulu ya beto; Nzambi na beto; mpe ntangu yayi Nzambi na kati ya beto. Nyonso yina Nzambi vwandaka, me kota na Klisto; nyonso yina Klisto vwandaka, me kota na Dibuundu.

Yinki ya kele? Nzambi na kusalaka na kati ya beno. Kisika nyonso na yinza ti Yandi ke zola kubokila beno, beno kele kaka kuna, ke sala na kati ya beno samu na kusala luzolo ya Yandi ya mbote. Yinki mutindu beto fwana pesa Nzambi matondo samu na yawu! Nzambi, Mpeve-Santu, me fidisama samu na lukanu ya Nzambi ya kuzinga na kati ya Dibuundu ya Yandi, na kusalaka na nzila ya konso nsungi, na kusalaka luzolo ya Yandi ya Kinzambi.

<sup>24</sup> Ntangu muntu ke seka beno, ba ke na kusekaka ve beno, ba ke na kusekaka Yandi yina fidisaka beno. Na yawu Yesu tubaka, “Kyese na beno ntangu bantu ke tuba mambu nyonso ya yimbi, ya luvunu na nzutu ya beno, samu na Nkumbu ya Munu. Kyese na beno.” Mpe, dyaka, “Bayina ke zinga na busantu kati ya Klisto Yesu ke mona mpasi.”

Samu ti, ntangu Nzambi kuzabakanaka Yandi mosi na Klisto, ba yinaka Yandi. Nani yinaka Yandi, ya kulutila? Dibuundu. Dibuundu yinaka Yandi, ya kulutila. Ba yinaka Yandi kulutila na munwi-malafu. Ba yinaka Yandi kulutila na bantu nyonso yankaka. Ya vwandaka dibuundu yina yinaka Yandi. Na yawu, kuna, ntangu beno ke mona *kosmos*, “Mutindu ya yinza ya kubongisa, yinza zaba Yandi ve,” ya zola kutuba, “dibuundu,” ya kufwanikisa, “zabaka Yandi ve. Yandi kwizaka na baya Yandi, mpe baya Yandi kuyambaka Yandi ve.”

“Kasi na bawu nyonso yina me yamba Yandi, na bayina ke kwikilaka na Nkumbu ya Yandi, na bawu Yandi me pesa kiyeka ya kukuma bana ya Nzambi.” Oh, mutindu beto fwana zola Yandi mpe kukembila Yandi! Lukanu ya Nzambi, zolaka kuvwanda na kati ya kubundana!

<sup>25</sup> Mutindu, ntete beto bika kisono yango, beto baka yayi; na bilumbu ya Ruth, na musiku ya mpulusu, ntangu Naomi bikaka yinsi, samu na kumekama, bantangu ya mpasi. Yandi kwendaka na yinsi ya bantu ya Moab, bayina vwandaka kaka Miklisto ya nkumbu, ya mwa tiya. Samu ti, bantu ya Moab kubasikaka na mwana ya kento ya Lot, mpe ba vwandaka mikwikidi ya kufwanikisa, mpe ya kuvukana. Mpe na manima bakala ya yandi kufwaka, mpe bana ya yandi ya babakala kufwaka. Mpe na nzila na yinzo, Naomi. . . Ruth mpe Naomi, na nzila ya yandi na yinzo, yandi. . . Mosi ya babukilo ya yandi ya kento, Orpah, yandi tubaka ti yandi ke vutuka na yinsi ya yandi, na banzambi ya yandi, mpe na dibuundu ya yandi, mpe na bantu ya yandi. Mpe Naomi mekaka na kusala Ruth kuvutuka, kasi yandi tubaka, “Bantu ya nge kele bantu ya munu. Nzambi ya nge kele Nzambi ya munu. Kisika nge ke kufwa, kuna mu ke kufwa. Kisika nge ke zikama, kuna mu ke zikama. Mpe mu ke vutuka ve.”

<sup>26</sup> Yina kele ntangu muntu me bakula vision. Ya vwandaka sala ata luswaswanu ve na yina bantu ya yandi vwandaka tuba, “Nge ke na kwendaka kuna na kukuma exalté to kima mosi.” Yina



salaka ata luswaswanu ve na Ruth. Ya vwandaka na lukanu ya Nzambi yina zolaka salama.

<sup>27</sup> Mpe kaka mutindu kieleka beno ke na nsatu ya Mpeve-Santu na nkokila yayi, ya kele kima na kati ya beno, ke na kubenda beno, samu ti lukanu ya Nzambi na luzingu ya beno fwana kusalama, kaka mutindu ya vwandaka na Ruth.

<sup>28</sup> Disolo kele kitoko mingi! Mu lenda kaka ve kubika yawu, samu na mwa- ntangu. Beno zaba musiku ya mpulusu, ti ntangu Boaz. . . Beno zaba disolo mutindu Ruth vwanda lokuta na bilanga mpe kuzwaka lemvo ya Boaz. Mpe ntete yandi kwela yandi, yandi zolaka kuula nyonso yina Naomi zimbisaka. Mpe muntu kaka yina zolaka kukuula lupangu yina Naomi zimbisaka, na musiku ya mpulusu, vwandaka musumbi ya pene-pene; yandi zolaka vwanda musumbi ntete yandi kukuula. Mpe yina vwandaka musumbi ya pene-pene ya dikanda. Mpe yandi zolaka sala kidimbu na ntuala ya bantu, na ngaanda ya mwelo, to kutuba na ntuala ya bantu ti yandi me kuula nyonso yina Naomi zimbisaka. Mpe Boaz kusalaka yawu na kukatulaka dipapa ya yandi na ntuala ya bakuluntu, mpe tubaka, “Kana ya kele na muntu awa yina kele na kima yina kele ya Naomi, munu bubu yayi me kuula yawu.”

<sup>29</sup> Mpe ya kele mutindu Nzambi salaka, na kulandaka misiku ya Yandi Mosi. Nzambi lenda kulanda ve, kupesa beno musiku mosi na kulanda mpe Yandi kulanda yankaka. Yandi ke landaka misiku ya Yandi Mosi. Na yina, Nzambi, na kukuula dibuundu ya kuzimbana, yinza ya kuzimbana, kivangu ya kuzimbana; Nzambi, Yandi yina kele ya kukondwa nsuka na Kimpeve, na kukuula bantu ya yinza ya kuzimbana, Nzambi Yandi mosi kumaka muntu ya dikanda, Muntu, Mwana yina Yandi vanga na kati ya kivumu ya Marie. Mpe kuna Yandi salaka kidimbu, to kimbangi; na ngaanda ya myelo ya Jérusalem, Yandi vwandaka ya kuzanguka kati-kati ya mazulu mpe ntoto, mpe kufwaka, mpe kuulaka nyonso. Mpe na kubasisaka menga, Yandi santisaka Dibuundu yina Yandi Yandi mosi zolaka zinga na kati, mpe kubundana mpe kuvukana, kisika yina ya kubundana yina zimbana katuka disamba ya Eden kisika Nzambi vwanda kulumukaka konso nkokila, na ngunga ya dibuundu.

Beno me tala? Nzambi vwanda kulumukaka na madidi ya kilumbu, ntangu mwini vwanda kota. Ya kele na kima ntangu ya ke bandaka na kukuma mpimpa, bantu ke banza na dibuundu mpe na Nzambi; Miklisto. Beno ke mona mwini kukota, beno ke bakula ti mwini ya beno ke na kukotaka.

<sup>30</sup> Mpe na madidi ya nkokila Yandi vwandaka kulumuka mpe vwanda bundana na bawu. Mpe kuna Yandi zimbisaka kubundana yango, samu ti disumu zolaka bika ve Yandi kusala yawu.

Mpe na manima Yandi kumaka nsuni mpe zingaka na kati-kati ya beto, samu ti Yandi lenda kuvutuka dyaka na muntu, mpe kuzinga na kati ya muntu, mpe kuvutula muntu na kitezo ya kuvukana na Yandi dyaka, mpe kuvutudila yandi muswa ya yandi yina Nzambi pesaka. Ya kele yina Yandi salaka.

<sup>31</sup> Yina kele lukanu ya Mpeve-Santu. Ya kele Tata, dyaka, Nzambi Tata kuzinga na kati ya beno, yina ke na kulungisaka makani ya Yandi, samu na kusukisa dikani ya Yandi ya mpulusu; na kusalaka na nzila ya beno, na kusalaka beno kisadi kintwadi na Yandi; na kupesaka beno kisika, na kupesaka beno kitini mosi samu na bayina ya beno kubwaka, mpangi-bakala mpe mpangikento ya kuzimbana; na kupesaka beno Mpeve ya Yandi mpe zola ya Yandi, samu na kwenda kuzomba bayina ya kuzimbana, mutindu Yandi salaka na disamba ya Eden. “Adam, Adam, wapi kisika nge kele?” Ya kele yina Mpeve-Santu ke salaka na bakala to kento. Ntangu Yawu ke kotaka na kati ya ntima ya bawu mpe Yawu ke sala kisika ya kuzinga, ya kele na mpwila mpe nsatu samu na myela ya kuzimbana.

Ya kele yina kele dyambu na balukutakanu bubu yayi. Kusimba ya Kimpeve kele dyaka mingi ve na kati ya yawu, samu na kwenda sosa myela ya kuzimbana mpe yina ke na kufwa. Ya kele ya kulutila samu na kusala nkumbu, to dibuundu, to yinzo ya nene, to dénomination, na kisika ya manaka ya kununga moyo. Mawa mingi! Beto lendaka vwanda ntangu mingi na zulu ya yawu.

Nzambi tsyamunaka Yandi mosi na kati ya Klisto. Ya kieleka.

<sup>32</sup> Klisto kutiamukaka Yandi mosi na kati ya Dibuundu. Na yawu, ntangu yayi beno tala mbote, “Na kilumbu yina beno ke zaba ti Mu kele na kati ya Tata, mpe beno na kati ya Munu, mpe Munu na kati ya beno. Na kilumbu yina beno ke zaba yawu.” Samu ti, ya kele, nyonso ya muvimba kele dikani mosi ya mpulusu yina ke na kusalamaka, ti Nzambi ke na kuvutukaka na kuzinga na kati, mpe kuvwanda na, mpe kuvukana na bantu ya Yandi, mutindu Yandi salaka na mbandukulu.

Ntangu yayi, na yina, ntangu Yandi ke kumisa Dibuundu ya Yandi na kitezo ya kuzonza, kukumisa Dibuundu ya Yandi na kisika yina Yandi lenda kukitiamuna Yandi mosi na nzila ya Yawu, mpe kuzola, mpe kundimisa, mpe kubundana, na manima kuna ke kwiza Eden. Yandi ke vutula Dibuundu ya Yandi na kisika Yandi—Yandi bikaka Yandi, kuvutuka dyaka na Eden mosi, kuna kisika Yandi kubwaka. Yandi, ntangu yayi. . . Ya kele kisika Yandi salaka kubanda ya Yandi ya ntete, to kubwa. Ya kele kaka kisika yina ba ke vutula Yandi, na konso dibaya ya kusonika ya kusukula na mpulusu, kuvutula bawu mbala mosi dyaka na kisika yango.

<sup>33</sup> Dibuundu me vwanda na yinza mwa ntangu. Mpe Dibuundu, kieleka, na manima ya kusungika, na bamvula funda mosi na bankama tanu ya bansungi ya mpimpa. . . Luther vwandaka muntu ya kusungika ya ntete yina kwizaka na manima ya ndonga ya bantumwa. Mpe kuna ntangu Luther kukwizaka, Nzambi me kubwisa mwa ndambu ya Mpeve mpe me tsyamuna Yawu na zulu ya Dibuundu, na lunungu. Mpe na manima na bilumbu ya Wesley, Yandi tsyamunaka mwa mingi ya Yandi mosi, na kusantisama. Mpe na yina nsungi vwandaka me kwenda na ntwala, tii ntangu ya nsuka, Nzambi vwanda fulusa Dibuundu ya Yandi. Beno tala kaka bisika nyonso mpe beno tala kana ya kele Kieleka to ve.

<sup>34</sup> Beno tala na nsungi ya Luther, beno bayina ke tangaka disolo, beno tala reveil ya bawu mpe yina ba salaka. Beno tala mutindu nene mingi vwandaka reveil ya Wesley, mutindu ngolo mingi bawu kuzwaka, kasi na mwa-bantu fioti. Beno tala mbote na bilumbu ya Pantekote, wapi reveil ba kuzwaka kuna, wapi ya nene, ya nene-nene.

<sup>35</sup> Mpe, *Nzenza Ya Beto Ya Lumingu*, zulunale ya Katolika, me tuba ti bantu ya Pentecote me basisa fuku mosi na mafunda tanu ya bayina me ndima na mvula mosi, kubika mabuundu nyonso yankaka kintwadi. Katolika me soba kaka, me tuba, fuku. Na *Nzenza Ya Lumingu* ya bawu mosi, na zulunale yina ba ke bokilaka *Nzenza Ya Lumingu*, ya tubaka ti bantu ya Pentecote me lutila bawu.

Mpe, beno bambuka moyo, bantu ya Pentecote yina ndimaka kele bantu ya kundima ya kufuluka na Mpeve-Santu. Na kati ya bantu fioti, na kubanda, na nsongi ya bala-bala kuna, na gutare ya ntama. Mpe bakento vwanda lenda ve kusumba basoseti. Ba vwanda vwanda na nzila ya masini, mpe vwanda buka masangu mpe vwanda nika yawu, mpe kusala dimpa samu na bana. Kasi yinki ya me kuma? Dibuundu yina kele na kisika ya kulutula ngolo na yinza bubu yayi, na meso ya yinza ve, kasi na meso ya Nzambi, samu ti Yandi ke na kulakisa yawu na yina Yandi ke na kusalaka samu na bawu. Yandi ke na kutiamuka Yandi mosi na kati ya bawu, ke na kutiamuna Yawu na kati.

<sup>36</sup> Beno tala ntangu yayi yinki kusalamaka, Nzambi Yandi mosi kutiamukaka na kati ya bawu. Ntangu yayi Dibuundu me kuma kisika, kubanda na Luther, Weley, mpe reveil me luta na Pentecote; mpe ntangu yayi na kati ya nsungi yayi yina beto ke na kukuma ntangu yayi, na nzila ya Mpeve-Santu mosi, kaka na kulutula ya Yawu. Ntangu yayi, ntangu bantu ya Luther yayi na ntangu ya ntama kuvuukaka, ba kuzwaka ndambu ya Mpeve-Santu. Ntangu ba-Méthodiste kuzwaka kusantisama, yina vwandaka kisalu ya Mpeve-Santu. Beno me mona, ya vwandaka ndambu ya Mpeve-Santu. “Bawu kukondwa beto kukuma ve ya kulunga,” me tuba Masonuku. Beno me mona?

<sup>37</sup> Ntangu yayi, Nzambi, mutindu Nsemo me banda na kupela mutindu ntangu na bilumbu ya nsuka, Yandi ke na kuvingila na beto, kima ya nene na beto. Samu ti, “Kisika ba me pesa mingi, kuna ba ke lomba mingi.” Na yawu Yandi ke lomba ya kulutula mingi na beto kuluta yina Yandi salaka na bantu ya Luther to ba-Méthodiste, samu ti beto ke na kutambula na kati ya Nsemo ya kulutula nene, na Ngolo ya kulutula nene, na ya kulutula nene. . . kimbangi ya kulutula nene na yina bawu kuzwaka. Ntangu yayi, beto ke na kimbangi ya kulutula nene ya mvumbukulu ya lufwa. Beto ke na bima ya kulutula ngwi, kieleka ya kulutula na yina bawu kuzwaka.

<sup>38</sup> Kasi ya kele kaka mutindu mu tubaka na lukolo mosi ya nene ya Luther, ntama mingi ve.

Ba tubaka, “Yinki kele na beto?”

Mu tubaka, “Muntu mosi kunaka bilanga ya masangu. Mwa makasa ya ntete me basika, mpe yandi me tuba, ‘Matondo Mfumu samu na kuyonzika ya masangu!’ Na kutala, yandi kuzwaka yawu, kasi yandi kuzwaka kaka yawu na kitezo ya ntete. Na manima ya mwa ntangu, ya me kuma dititi.”

Mpe felele me basika na yawu, yina vwandaka ba-Méthodiste.

<sup>39</sup> Kana beno tala mbote bima ya yinza, beno ke mona Nzambi kusala. Ya kele na dinsweki kuna yina ke vukana ministere ya munu. Beno me mona? Ti, na kutalaka mbote bima ya yinza, kumona mutindu ya ke salaka, na wapi nsungi mpe na wapi ntangu, beno lenda mona kisika beno ke na kuzinga. Beno tala mbote nsungi.

<sup>40</sup> Ntangu yayi, na yina, ba-Méthodiste, ba vwandaka bafelele. Bawu talaka na manima na bantu ya Luther, ba vwanda tuba, “Beto kele na kusantisama; beno kele ve na kima na Yawu.”

Na manima ya mwa bilumbu, kubanda na pollen yina, kubanda na ba-Méthodiste, me basika mbuma ya . . . disangu. Yina vwandaka Pentecote.

Beno bawu yayi, lunungu, kitezo mosi ya Yawu. Kusantisama, kitezo yankaka ya Yawu. Mpeve-Santu, kitezo yankaka ya Yawu; Pentecote. Luther, Wesley. Pentecote.

<sup>41</sup> Ntangu yayi yinki Pentecote ke na kusala? Mu ke fwanikisa yawu, samu ti, na Pentecote, ya vutulaka, ve dikasa ya mubisu, ve felele, kasi. . .

Disangu lenda tuba ve na felele, “Mu kele na nsatu ya nge ve.” To, felele lenda tuba ve na dikasa, “Mu ke na nsatu ya nge ve,” samu ti luzingu mosi yina vwandaka na kati ya dikasa kusalaka felele. Luzingu mosi yina vwandaka na kati ya felele kusalaka disangu.

Mpe ya vwandaka dibuundu ya Luther yina salaka dibuundu ya Wesley. Ya vwandaka dibuundu ya Wesley yina salaka Pentecote.

Kasi, Pentecote, yinki ya kele? Ya kele kuvutula ya mutindu mosi ya mbuma yina kwendaka na kati ya ntoto na kubanda, yina me vutula kifuluka nyonso ya Ngolo ya Pentecote, na nzila ya mbotika ya Mpeve-Santu, beno me mona, na bilumbu ya nsuka. Oh, ya kele kima ya nene, na kutala, na kukwikila mpe na kutala.

<sup>42</sup> Ntangu yayi na nsungi yayi yina beto ke na kuzingaka, nsungi yayi, ya kele ntama mingi na Pentecote.

Pentecote me sala yawu mosi ba-organisation, mpe me banda na kubaluka na mingi ya mabanza ya ba-organisation, “Beto kele *yayi* mpe beto kele *yina*.” Yina kele kaka bima ya yinza. Beno lenda kaka ve kusadisa yawu. Ya kele bima ya yinza. Ba ke sala yawu. Ya kele manaka, samu ti bawu sala yawu.

Kasi Dibuundu me landila na kukwenda na ntwala. Yawu me kota na ya kulutula nene, na ya kulutula ngolo. Ya kele kuvutula ya makabu.

Mpe mingi ya bantu ya Pentecote ke kwikilaka ve na kubeluka ya nzutu ya Kinzambi, na kisalu ya Bawanzio, mpe na bangolo ya Nzambi. Mingi ya bantu ya Pantekote ke bokilaka ba-vision yayi yina mu ke monaka, “dyabulu.” Mingi ya ba-organisation zola mpe ve kuzwa kima ya kusala na Yawu, na Pentecote. Beno me mona, beto me kwenda ntama mingi na yawu. Kaka mutindu ba-Méthodiste ke bokilaka Pentecote, “bulawu,” samu na bakuzonza ya badinga ya malu-malu. Kaka mutindu bantu ya Luther ke bokilaka ba-Méthodiste, “bulawu,” samu na kuboka. Beno me mona?

Kasi ya kele nyonso kubasika ya Mpeve-Santu, tii Dibuundu ya nene ke vwanda ya kifuluka, mpe ke vimba nyonso, Alleluia, [Mpangi Branham me konkota na chaire bambala zole—Mu.] ya bangolo ya nene ya Nzambi ya ngolo nyonso. Tii, ya ke kuma na kisika tii bisalu ya kieleka yina Yesu salaka ke talana yawu mosi mbala mosi na kati ya Dibuundu ntangu yayi. Beto kele penepene, bankundi.

<sup>43</sup> Ti mu telama ntete awa, mwa minuti kaka, samu na kutuba samu na yinki Nzambi tulaka Mpeve-Santu na kati ya Dibuundu, kupesa beno kifwanusu yankaka samu beno kuzaba. Na Ngwisani ya Ntama, ntangu mwana . . .

Bakala vwanda sala yinzo. Yandi ke kuzwa kento ya dikwela, yina vwandaka kima ya ntete.

Na manima yandi me kuma muntu ya nene, mutindu organisation. Ya vwandaka mbote.

Kima yina vwandaka salama na manima, me kwiza lubutuku na yinzo yango. Ya kele ntangu Mpeve-Santu, beno me mona,

mpeve yankaka me kota, ya vwandaka mwana ya bakala. Mwana yango ya bakala, yandi vwandaka na kizutu nyonso ve, yandi vwandaka ve difwa tii yandi zolaka kuzwa mvula mosi. Mpe yandi zolaka luta na kuteza, ntete. Yinga.

Mpe kuna ba vwandaka na musiku ya lukumu ya bana. Na beno milongi, “kutulama ya mwana,” kele yina mu ke na kuzonzila ntangu yayi, beno me mona, tii ntangu yandi ke kwiza na kisika yina yandi ke vwanda ya kundima. Yesu pesaka kifwanikisu mosi ya kitoko ya yawu, na Mongo ya Kukituka.

<sup>44</sup> Mutindu mu vwanda me tuba, ata mbala mosi ve ti Nzambi ke kwenda na ngaanda ya misiku ya Yandi samu na kusala kima.

Kana beno kele na dibulu masa ya kisina na mongo yayi, yina ke na kubasisa maza bisika nyonso na zulu. Mpe na mongo yankaka yayi na lweka awa, beno kele na kuyonzika yina ke na kunyengaka. Beno lenda kutelama na mongo yayi mpe kuboka, “Oh, maza, kwiza awa mpe fulusa kuyonzika ya munu! Oh, maza, kuma na kuyonzika ya munu!” Ata mbala mosi ve ti ya ke sala yawu. Kasi kana beno sala landila misiku ya ngolo ya kubenda, beno lenda tula maza na kuyonzika yango.

<sup>45</sup> Beno kele na muntu ya kubela ya kulala awa, to musumuki ya kulala awa, to muntu yina zola kuvwanda ya kulunga, yina lenda ve kubika kunwa malafu, yina lenda ve kubika kunwa tabaka, yina lenda ve kubika kulula mpe nyonso. Kana beno ke sala kaka landila misiku ya Nzambi, ti Mpeve-Santu kukota kuna, kuna yandi kele dyaka ve yandi mosi. Yandi, yandi ke bika kima yina, samu ti Mpeve-Santu me yala yandi. Kasi beno fwana sala landila misiku ya Nzambi, ba muswa ya Nzambi.

<sup>46</sup> Ntangu yayi, na Ngwisani ya Ntama, ntangu bébé yayi vwanda butuka, ba vwanda tala yandi mbote, kumona mutindu nkadulu ya yandi vwandaka, nkadulu.

Na yina tata, na kuvwandaka muntu ya nene ya mumbungu na ntangu yina, na kutala na kati ya makumi yiya to makumi tatu ya yandi ya bamvula, yandi kuzwaka ntangu ve ya kulongisa bébé yayi, yandi mosi, na yawu yandi bakaka. . . Na bilumbu yango ba vwandaka ve na balukolo ya bantu nyonso mutindu beto kele na yawu ntangu yayi, na yawu ba vwanda kuzwa yina ba vwanda bokilaka “longi,” to “musansi,” mulongi ya lukolo. Mpe mulongi ya lukolo yayi vwandaka ya kulutila mbote yina yandi lendaka kuzwa, na yawu ti yandi zolaka vwanda ya kusungama mpe kutuba na tata kieleka na yina me tala yandi.

<sup>47</sup> Mpe kuna ntangu mwana ya bakala yayi vwanda kuzwa mvula mosi, beto tuba, yandi vwandaka me kula. Kana mwana ya bakala yango vwandaka kaka kimpumbulu, mbote na kima ve, vwanda kipe ve mumbungu ya tata; nyonso yina yandi vwandaka banza vwandaka kusosa mpe kutambula na bakento, to—to kunwa, to kubula bansaka, to kukima ya bampunda; mwana ya bakala yina zolaka vwanda ntangu nyonso mwana,

kasi ata mbala mosi ve ti yandi zolaka tulama na kisika ya kubyadila nyonso yina tata ya yandi kuzwaka.

Kasi kana yandi vwandaka mwana ya bakala ya mbote, mpe ti yandi vwannda kipe mumbungu ya tata ya yandi, mpe ti yandi me lakisa kuvwanda mwana ya kulunga, kuna ba zolaka sala mukembo. Ba vwanda nata mwana ya bakala na bala-bala mpe vwanda lwatisa yandi robe ya mpembe, mpe ba vwanda matisa yandi na kisika ya kunanguka samu bantu nyonso ya mbanza kumona. Ba vwanda sala feti mpe mukembu, mpe tata kuna vwanda sala nkinzi ya lukumu ya mwana. Yandi vwannda ndima mwana ya yandi mosi na kati ya mumbungu ya yandi mosi, mpe kuna mwana vwannda vwannda mosi na tata ya yandi. Na nzonzolo yankaka, kana ya me vwanda bubu yayi, nkumbu ya mwana na chèque zolaka vwannda mbote kaka mutindu ya papa.

<sup>48</sup> Ntangu yayi beno tala mbote yina Nzambi salaka. Ntangu Mwana ya Yandi kubutukaka, Yandi bikaka Yandi kukwenda bamvula makumi tatu, na kuteza Yandi, na kumeka Yandi. Na manima Yandi me pesa Yandi bamvula tatu ya ba kumekama ya ngolo. Mpe na manima na nsuka ya ba kumekama ya ngolo, ntangu Yandi monaka ti Mwana ya Yandi vwannda kipe mumbungu ya Tata; Mongo ya Nsobolo, na Buku ya Luc; Yandi bakaka Pierre, Jacques, mpe Jean, bambangi tatu, mpe mataka na zulu ya mingo, mpe kuna Nzambi salaka misiku ya lukumu ya bana. Yandi. . .Ba nangulaka meso mpe ba monaka Yesu, mpe bilele ya Yandi vwannda kupela mutindu mwini mpembe mutindu lusyemo. Mpe mutindu Dituti fukaka Yandi na kivudi ya yandi, mpe Ndinga basikaka na Dituti, mpe tubaka, “Yayi kele Mwana ya Munu ya luzolo; beno kuwa Yandi. Mu ke vwannda ntangu yayi mpe ke kuzwa dyaka ve ya kutuba. Yina Yandi ke tuba kele musiku mpe Kieleka.”

<sup>49</sup> Ntangu yayi dibuundu me luta na balukolo yango. Yandi me kwela kuna, bilumbu mingi me luta, mpe me kuma dénomination, organisation. Kasi, beno tala, Lubutuku basisaka kima yankaka. Mpe ntangu yayi ya me kuma na kisika dibuundu ya Pentecote, na Lubutuku ya malu-malu, ba me tezama mpe me mekama, mpe ntangu yayi ya ke na kukuma na kisika. . . Nzambi ke salaka ve na Dibuundu mutindu kaka organisation. Yandi ke salaka ve na Dibuundu mutindu nkonga ya bantu.

Yandi ke salaka na Dibuundu na mutindu ya mosi na mosi, na mosi na mosi na kati ya Dibuundu. Mpe ntangu yayi ya me kuma na ntangu. . .Mpe ya kele dinsweki ve; beto nyonso ke na kumona yawu. Ntangu muntu me lakisa bimbangi, mpe ti Nzambi me zola yandi, Yandi ke nata yandi kisika mosi na Yandi mosi. Kuna na ntwala ya Bawanzio Yandi ke sala kima samu na yandi. Yandi ke zangula yandi kuna na Ntwala ya Nzambi, mpe ke pesa yandi makabu, mpe ke fulusa yandi, mpe ke fidisa yandi. Ya kele nsungi yina beto ke na kuzingila.

<sup>50</sup> Mpeve-Santu mosi yina vuukisaka bantu ya Luther; yina santisaka ba-Méthodiste; yina botikaka bantu ya Pantekote; ke na kubongisaka ntangu yayi Nkwizulu ya Mfumu Yesu. Ntangu, ya ke vwanda ngolo mingi, Nzutu yango, ke kota na Nkonga yayi, Dibuundu, yina ke basisa bayankaka ya bawu na ntoni. Kuna mvumbukulu ya bafwa ke salama. Ya kele samu na yina Mpeve-Santu kele. Yinki kele Mpeve-Santu? “Kukondwa beto bawu lenda ve kukuma ya kulunga.” Ba zingaka na kilumbu mosi, landila yina. Beto ke zinga na kilumbu yankaka.

“Ntangu mbeni ke kwiza mutindu nzadi, Mu ke . . . Mpeve ya Nzambi ke telemisa dalapo na ntwala ya yawu.” Beno me mona? Ntangu yayi beto kele na kati ya kilumbu . . .

<sup>51</sup> Na ntangu yina, ba vwandaka ve na ndambu ya mayele mingi mutindu bubu yayi. Ba zolaka lenda ve kusala bombe atomique to ditoma. Ba vwandaka ve na luzabu ya yinza mpe bima mutindu yina kele na beto ntangu yayi, kasi, mpe bima ya bima ya ngitukulu; na kumeka na kutuba ti muntu basikaka na yandi mosi, na mwa fundu-fundu mpe nyonso yina, mpe kubaka kutala mosi mpe kumeka na kulakisa yawu, samu na kusala bantu ya kukondwa kwikama.

Kasi ntangu yayi, ntangu beto ke sosa Yawu, Mpeve ya Nzambi ke telemisa dalapo. Yinki ya kele? Yandi ke na kutsyamuna na kati Mpeve ya Yandi. Na yina, bayina ke na kupemaka kuna na ntoni, to na yisi ya autel ya Nzambi, mutindu Masonuku ke tuba, ke na kudila, “Bilumbu yikwa, Mfumu? Bilumbu yikwa? Babilumbu dyaka yikwa?” Nzambi ke na kvingilaka munu na nge. Dibuundu ke na kvingilaka munu na nge. Ntangu ya lukumu ya bana, ntangu Nzambi lenda kutsyamuna na kati ya beto nyonso ya Yandi, Ngolo ya Yandi, mvumbukulu ya Yandi, ti ntangu Dibuundu mpe Klisto ke kuma pene-pene mingi kintwadi tii Klisto ke kuma ya kumonana na kati-kati ya beto, mpe ke mvumbula mafwa, mpe ti beto ke kwenda na Enlevement.

<sup>52</sup> Ntangu yayi beto ke tuba, ke lakisa na manima ya mwa ntangu fyoti, ti kaka bayina kele ya kifuluka na Mpeve-Santu ke kwenda na Enlevement yango. “Samu ti bantu yankaka ya kufwa kuvutukaka ve na luzingu bamvula funda mosi.” Ya kele kieleka. Kaka bantu nyonso ya kifuluka na Mpeve-Santu kwendaka na Enlevement. Ntangu yayi, Nzambi pesaka Mpeve-Santu . . .

<sup>53</sup> Mu kele na Masonuku yankaka awa, na Jean 14:12. Ya kele kieleka Masonuku ya ntangu nyonso samu na bantu nyonso awa na tabernacle.

*Ya kieleka, ya kieleka, mu ke tuba na beno, Yandi yina ke kwikila na munu . . .*

Ntangu yayi, beno bika ve ti mpova yayi “kwikila” mutindu kuvutula beno manima. Na dibuundu ya nkumbu, ba ke tuba,



“Yinga, mu ke kwikila. Kieleka, mu ke kwikila Yesu Klisto kele Mwana ya Nzambi.” Dyabulu ke kwikilaka kima mutindu mosi. Ya kele kieleka. Biblia ke tuba ti yandi ke kwikilaka yawu.

Kasi Masonuku ke tuba, na Jean, ti, “Muntu ve lenda bokila Yesu Klisto, kaka na nzila ya Mpeve-Santu.” Beno, na kutala, na nzila ya Masonuku. . . Ti mu telama ntete awa mwa minuti kaka, ntete mu manisa kutanga. Beno kele ya kundima ve tii beno me kuzwa Mpeve-Santu. Ya kele kieleka.

<sup>54</sup> Beno ke na kukwikilaka “tii.” Mpeve-Santu zonzaka na beno, mpe beno me tuba Yandi na ntwala ya bantu. Dyabulu ke na kima mutindu mosi. “Mu ke kwikila ti Yandi kele Mwana ya Nzambi.” Mutindu mosi ke salaka dyabulu. Kasi beno ke na kutambula na kisika ya Yandi.

Ntangu, ba bokilaka mpe nungisaka Pierre, na kukwikilaka na Mfumu Yesu Klisto; mpe na Jean 17:17, Yesu santisaka bawu na nzila ya Ndinga, samu ti Ndinga vwandaka Kieleka. Mpe Yandi vwandaka Ndinga. 1te, ya Jean ke tuba, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni, mpe zingaka na kati-kati ya beto.” Yandi vwandaka Ndinga, na yawu Yandi santisaka bawu. Yandi tubaka, “Tata,” vwanda zonza na Mpeve na kati ya Yandi, “Mu me santisa bawu na nzila ya Ndinga,” Yandi mosi, na kutentikaka maboko ya Yandi na zulu ya bawu. “Ndinga ya Nge kele Kieleka.” Zonzaka kaka Yandi kwizaka na luzingu, na kati ya kivumu ya kento; oh, na mutindu nyonso ya lenda salama ve samu na Yandi na kuvwanda na mutindu yankaka kana Ndinga ya Nzambi yayi kusala Yandi kutalana. “Mu me santisa bawu.”

<sup>55</sup> Yandi pesaka bawu kiyeka na kutelemina bampeve ya yimbi. Ba basikaka. Yandi me tula bankumbu ya bawu na kati ya Buku ya Luzingu ya Mwana dimeme. Mpe Yandi fidisaka bawu, Jean. . . Matthieu 10, mpe pesaka bawu kiyeka na zulu ya bampeve ya yimbi; vwanda basisa bampeve ya yimbi, mpe vwanda sala bisalu, mpe nyonso yina. Mpe bawu tutukaka, na kyese nyonso, tubaka, “Bampeve ya yimbi mpe tumamaka na beto.”

Yandi tubaka, “Beno yangalala ve samu ti bampeve ya yimbi ke na kutumamaka na beno; kasi beno yangalala samu ti bankumbu ya beno kele na kati ya Buku.” Mpe Judas vwandaka na bawu. Beno me mona mutindu pene-pene yandi lenda kwiza; kuluta na nzila ya lunungu, kulandila tii kusantisama. Kasi wapi kisika yandi lakisaka nsemo ya yandi? Wapi kisika yandi kulakisaka yandi mosi? Ntete Pentecote, yandi lakisaka bantinta ya yandi.

<sup>56</sup> Beno tala mbote, mpeve yango ke vwanda kaka mutindu kinzambi mpe kaka mutindu muntu ke nwanila nkadulu ya buzitu mutindu ya lendaka vwanda, tii ya ke kwiza na Mpeve-

Santu, mpe ba ke zenga Yawu kaka kuna. Yina kele mpeve yango (beno lenda mona yawu ve?) kumata, mbeni ya Klisto. Mpe Yesu tubaka, “Ba ke vwanda pene-pene mingi kintwadi, na bilumbu ya nsuka, ti ya ke vuna Musolami ya kieleka kana ya lendaka salama.” Kasi, beno bambuka moyo, ya kele kaka yina Soolamaka ti ke mona yawu.

Nzambi ke bokilaka na nzila ya nsodolo. Beno, beno kele na kyese ve ti beno kele mosi ya bawu? [Dibuundu me tuba, “Amen.”—Mu.] Beno ve, bantu awa na nkokila yayi, na kuzabaka ti kima na kati ya ntima ya beno ke na kubenda, “Mu zola Mpeve-Santu yango. Mu zola Nge, Mfumu, na kati ya ntima ya munu”? Yina kele samu ti Nzambi tulaka nkumbu ya beno na Buku ya Luzingu ya Mwana-dimeme katuka mbandukulu ya yinza. Yandi tubaka yawu.

“Muntu ve lenda kwiza na Munu,” tubaka Yesu, “kana Tata ya Munu me benda yandi ntete. Mpe nyonso yina ke kwiza na Munu, Mu ke pesa bawu Luzingu ya Seko.” Yinki kele Luzingu ya Seko? Mpeve-Santu. “Luzingu ya Seko,” beno baka mpova yango mpe beno nata yawu na Grec, mpe ya ke tuba, *Zoe*. *Zoe* kele Mpeve-Santu. “Nyonso yina Tata me pesa Munu ke kwiza na Munu. Mpe nyonso yina ke kwiza na Munu, Mu ke pesa yandi Mpeve-Santu, mpe Mu ke vumbula yandi na lufwa na kilumbu ya nsuka. Mu ke sala yawu,” Yandi tubaka. Ya ke vwanda ve na kana-na-mpe na zulu ya Yawu. “Mu ke sala. Nyonso yina ke kwiza; mpe Mu ke pesa Luzingu ya Kukonda nsuka.” Yandi ke vumbula na lufwa, samu ti yandi kele na Luzingu ya Seko. Yandi fwana kwiza. Lenda kufwa dyaka ve ti Nzambi lenda kufwa.

<sup>57</sup> Oh, bankundi ya munu ya luzolo ya bisika nyonso ya yinsi yayi mpe na kati ya mwa mbanza yayi, kana mu lendaka kaka, na ndinga ya munu ya kimuntu, kutula na kati ya ntima ya beno luvalu ya kuyamba mbotika ya Mpeve-Santu, ya ke vwanda luzayikisu ya kulutula mbote yina beno me kuzwaka ntete na luzingu ya beno. Na kumona yinki . . . Beno fwana sala yawu.

Bika mu sala yawu pwelele, na, “Beno kele ya kundima ve.”

<sup>58</sup> Pierre vwandaka ya kuvuuka. Yandi kwikilaka na Mfumu, landaka Yandi. Yesu tubaka na yandi nani yandi vwandaka, salaka yandi kulanda Yandi. Yandi pesaka yandi kiyeka ya kutelemina bampeve ya yimbi mpe santisaka yandi. Kasi na manima ya nyonso yina, mpe kumaka nzonzi ya mfumu na kati ya nkonga; mutindu bantu ya Katolika ke zola kubokila yawu, “*évêque* ya dibuundu, to pape,” to nyonso yina ya vwandaka, mfumu ya dibuundu; dyaka Yesu tubaka, na mpimpa ya kubwila ya yandi, “Nge zola Munu, Pierre?”

Mpe yandi tubaka, “Mfumu, Nge zaba ti mu zola Nge.”

Yandi tubaka, “Disa mameme ya Munu.” Yandi tubaka yawu bambala tatu.

Mpe Pierre tubaka, “Nge zaba ti mu zola Nge, ti mu ke kwenda na Nge tii na nsuka, mpe mu ke kwenda na Nge na lufwa,” mpe nyonso yina.

<sup>59</sup> Yandi tubaka, “Ntete nsusu kuyimba bambala tatu, nge ke . . . ntete nsusu kuyimba, nge ke manga Munu bambala tatu.” Yandi tubaka, “Kasi, Pierre, Mu me sambila samu na nge.” Beno kuwa. Yina kele nyonso ya yawu ve. “Mu me sambila samu na nge. Mpe na manima nge me ndima, kuna kindisa bampangi ya nge.”

“Na manima nge me ndima.” Yandi kubokaka. Na kutala yandi binaka na Kimpeve. Yandi, yandi salaka mitindu nyonso ya bima, kasi yandi kuzwaka ntete ve Mpeve-Santu. “Na manima nge me ndima, kuna kindisa bampangi ya nge,” ya kele kieleka, “sala dikani ya Yandi.”

<sup>60</sup> Ntangu yayi beno bika munu kumanisa kutanga Jean 14:12. Ntangu yayi na kapu ya 14 mpe na nzila ya 12, Yesu tubaka, “Ya kieleka, ya kieleka, Mu ke tuba na beno, yandi yina ke kwikila . . .” Mpe beno lenda ve kukwikila . . . “Ke kwikila na Munu.” Beno lenda kwikila *tii* na Yandi. Bantu yikwa ke bakula yawu, beno tuba, “Amen.” [Dibuundu me tuba, “Amen.”—Mu.]

<sup>61</sup> Beno ke bambuka moyo, na Actes 19. Beno lemvokila munu na kutelama awa, kasi mu fwana kaka kutuba yawu mutindu ya ke kwiza na munu. Na Actes kapu 19, ntangu mulongi ya Baptiste yayi, yina vwandaka muntu ya misiku mpe yina vwandaka me balula ntima, mpe yandi vwanza longi mpe vwanza nata bantu na kuvuuka. Mpe ba vwanza na kyese ya nene, vwanza yangalala kaka mpe vwanza boka, na lukutakanu. Actes 18, Aquilas mpe Priscille, beto talaka yawu mazono na nkokila, mpe ba kwendaka mona yandi. Mpe ba zabaka ti yandi vwanza muntu ya nene, mpe ti yandi vwanza muntu yina vwanza ya kuzaba. Mpe yandi vwanza lakisa na Biblia ti Yesu vwanza Mwana ya Nzambi, na kuzabaka kaka mbotika ya Jean. Yandi zabaka ntete ve mbotika ya Mpeve-Santu. Na yawu yandi tubaka . . .

Aquilas mpe Priscille, bakala na kento yina, mwa mitungi batenta; mpe, Paul vwanza mutungi batenta, mpe. Mpe bawu kuzwaka Mpeve-Santu landila malongi ya Paul. Ba tubaka, “Beto kele na mwa mpangi-bakala yina ke na kwizaka awa. Ti yandi zonza na beto mwa fyoti na yawu.”

Mpe ntangu Paul kwizaka mpe kuwaka yandi kulonga, yandi zabaka ti yandi vwanza muntu ya nene, yandi tubaka, “Beno kuzwaka Mpeve-Santu ntangu beno kwikilaka?”

Ba tubaka, “Beto zaba ve ti ya . . . kana ya kele na Mpeve-Santu.”

Yandi tubaka, “Na yina na yinki,” to mpova ya kiekaka ya Grec ya kele, “na wapi mutindu beno botamaka?”

Ba tubaka, “Beto botamaka yimeni na Jean Mubotiki.”

<sup>62</sup> Ntangu yayi beno tala mbote yinki Paul tubaka. Paul tubaka, ti, “Jean kubotikaka kieleka samu na kufungula masumu; ve samu na lemvo ya masumu, kasi na kufungula masumu, na kutuba, ya kele yina beno ke kwikila.”

Ntangu beno ke ndima Klisto mutindu Mvulusi ya beno mosi, beno ke kwikila *tii* mbotika ya Mpeve-Santu. Ya kele mbotika ya Mpeve-Santu ve, nkundi ya munu ya Baptiste ya luzolo. Ya kele luvunu.

Mpangi mosi ya bakala tubaka na munu kilumbu yankaka yina, yandi tubaka, “Mpangi Branham,” to mwa ntangu me luta, bangonda me luta, yandi tubaka, “Mpangi Branham, Abraham kwikilaka na Nzambi, mpe ya vwandaka ya kutangila na yandi samu na ludedomo.”

Mu tubaka, “Ya kieleka.”

Yandi tubaka, “Yinki dyaka muntu lendaka sala kana kaka kukwikila?”

<sup>63</sup> Mu tubaka, “Ya kele nyonso yina muntu lendaka sala. Ya kele nyonso yina yandi lenda sala bubu yayi, ya kele kukwikila Nzambi. Kasi Nzambi pesaka yandi kidimbu ya kuzengisa bubakala,” yina beto talaka mazono na nokokila, “mutindu kidimbu ti Yandi kundimaka lukwikilu ya yandi na Yandi.” Mpe, bubu yayi, tii Nzambi . . .

Beno ke kwikila na Yandi ntangu beno ke ndima Yandi mutindu Mvulusi ya beno mosi. Kasi ntangu Nzambi ke pesa beno kidimbu ya Mpeve-Santu, Yandi ke tula beno kidimbu tii na kisika ya beno ya Seko. Ntangu yayi beno ba-Baptiste beno baka yawu, mpe mu ke kwenda na beno na lukengolo ya Seko. Yinga, tata. Samu ti, “Beno nyongisa ve Mpeve-Santu ya Nzambi, na yina beno kele ya kutula kidimbu tii kilumbu ya beno ya mpulusu.” Beno kele ya kutula kidimbu ve na kukwikilaka tii, kasi ya kutula kidimbu na nzila ya Mpeve-Santu. Éphésiens 4:30, “Beno nyongisa ve Mpeve-Santu ya Nzambi, na yina beno kele ya kutula kidimbu tii kilumbu ya beno ya mpulusu.” Yina ke tula beno kidimbu, ntangu beno ke kuzwa lemvo na Nzambi, mpe Yandi ke tula beno kidimbu na nzila ya Mpeve-Santu.

Ya kele yina, samu ti Biblia ke tuba, “Muntu ve lenda bokila Yesu Klisto, kaka na nzila ya Mpeve-Santu.”

<sup>64</sup> Beno ke tuba, “Mu ke kwikila yawu samu ti pasteur tubaka yawu.” Yandi me vuna ve, kasi yina kele na luvalu ve samu na beno. “Mu ke kwikila yawu samu ti Ndinga me tuba mutindu yina.” Ya kele kieleka, kasi ya kele samu na beno ve, yina kele na mfunu ve samu na beno.

Mutindu kaka ti beno lenda tuba ti Yesu kele Klisto, kele ntangu Mpeve-Santu ke kota na kati ya beno mpe ke basisa kimbangi, mpe ke pesa kimbangi Yandi mosi, “Yandi kele

Mwana ya Nzambi.” Ya kele mutindu kaka yina beno ke zaba mvumbukulu ya mafwa, kele ntangu Mpeve-Santu ke pesa kimbangi. “Ntangu yandi Mpeve-Santu ke kwiza, Yandi ke pesa kimbangi ya Munu, ke lakisa beno bima yina ke kwiza; ke bambula beno moyo na bima yayi, yina mu tubaka, na beno.” Ata mbala mosi ve beno ke tala yawu na lukolo. Beno me mona? Yandi ke bambula beno moyo na bima yayi.

<sup>65</sup> Ntangu yayi beto zola kutanga kaka mwa ntama mingi na Masonuku ntangu yayi, Santu Jean 14:12.

*Ya kieleka, ya kieleka, mu ke tuba na beno, Yandi yina ke kwikila na munu, bisalu yina mu ke sala yandi mpe ke sala; mpe ya kulutula nene. . .*

Na yina, lubangulu ya kulunga ya kele “mingi,” kana beno zola kukwenda tala yawu.

*. . . bisalu ya kulutula nene yandi ke sala; samu ti mu ke na kukwenda na Tata.*

<sup>66</sup> Kana Yandi kwendaka na Tata, Mpeve-Santu ke kwiza. Ya kele kieleka? Masonuku yankaka ke tuba, “Kana Mu kwenda ve, Kisadisi ke kwiza ve. Kasi kana Mu kwenda, Mu ke kwiza dyaka mpe ke vwanda na beno, mpe na kati ya beno.” Beno me mona, ya kele Nzambi na beno. Na zulu ya beno, ntete; na beno, na kati ya Klisto; na kati ya beno, na kati ya Mpeve-Santu. Ya kele Nzambi na kati ya beno.

<sup>67</sup> Ntangu yayi, “Bisalu yina Mu ke sala beno mpe ke sala,” kisalu yankaka ve. Kasi Nzambi zola kunata Mpeve-Santu, na kati ya beno, samu na kulandila kisalu mosi yina Yandi vwanda sala na kati ya Klisto.

Kisalu vwandaka lomba mingi ve na bilumbu ya Luther. Yina vwandaka Dibuundu ya Nzambi. Ya vwandaka ve. . . Mwa fyoti dyaka ya kulombama na bilumbu ya Wesley.

Samu ti, “Yinza,” Biblia ke tuba, “ke vwanda ya kulemba mingi, mpe ya mayela mingi, mpe ya kulutula yimbi ntangu nyonso.” Beto ke. . . Yinza ke na kukumaka ya kulutula yimbi nyonso. . . Beto zaba yawu. Beto tala, muntu ke sala bima bubu yayi yina, bankama ya bamvula me luta beno zolaka banza ve ti muntu ya moyo zolaka vwanda yimbi mutindu yina. “Kulutula yimbi ntangu nyonso, mpe bantu ya yimbi ke sala yimbi kulutula, ntangu nyonso,” me tuba Masonuku, “kulutula mpe kulutula.”

<sup>68</sup> Na yawu, Mpeve-Santu me landila na kukwenda. Ya vwandaka kaka mwa mupepe ya Yawu na Luther; mwa kufula ya Yawu na Wesley; mpe kufula ya kukota mingi ya Yawu na Pentecote; ntangu yayi mupepe mpe Mpeve me kuma mosi. Kento ke na kuvukanaka kintwadi, na kubasisaka mutindu mosi ya kufula ya ngolo ya Mpeve-santu mutindu Yandi salaka na ntangu yina, ke na kulakisaka bisalu mosi yina Yandi salaka na ntangu yina, me talana bubu yayi kaka, kima mutindu mosi.

<sup>69</sup> Beno tala mbote yinki Yesu tubaka. “Ya kieleka, ya kieleka Mu ke tuba na beno, Mwana lenda sala kima ve kana Yandi mona Tata kusala yawu ntete. Yina Tata ke sala, Yandi ke lakisa Mwana. Tata ke zingaka na kati ya Munu; Yandi ke salaka bisalu.” Beno me mona?

<sup>70</sup> Ntangu yayi beno tala, yayi kele kima yankaka mu zola kutuba kaka awa. “Mutindu,” Yesu tubaka, “mutindu Tata me fidisa Munu. Mutindu,” ntangu yayi beno tala mbote, “mutindu Tata me fidisa Munu, mutindu mosi Mu me fidisa beno.” “Mutindu Tata . . .” Yinki mutindu Tata fidisaka Yandi? Tata, yina fidisaka Yandi, kulumukaka Mazulu mpe kwizaka zinga na kati ya Yandi.

Yandi me kwenda na ntwala. Yandi tubaka, “Mu ke salaka ntangu nyonso yina ke sepelisaka Tata ya Munu.” Beno me mona? Yandi kwendaka na kusalaka bima yina Tata vwanda lakisa Yandi na kusala. “Mu ke salaka kima ve kana Tata ya Munu kulakisa Munu ntete.” Nzambi yina fidisaka Yandi, vwandaka na kati ya Yandi. “Mpe mutindu Tata fidisaka Munu, mutindu mosi Tata fidisaka Munu, mutindu mosi Mu me fidisa beno.” Yinki ya kele? Nzambi na kati ya beno, kulandilaka (yinki?) bisalu mosi.

Yesu tubaka, “. . . yandi yina ke *kwikila*, yandi yina kele na Munu na kati ya yandi, Mpeve-Santu; yandi yina ke *kwikila*, yina yimeni ke na kimbangi ya mvumbukulu ya lufwa ya Munu, zaba ti Mu kele na kati ya yandi. Yandi yina kele na kati ya Munu; kana beno kangama na kati ya Munu, Bandinga ya Munu na kati ya beno.”

<sup>71</sup> Ntangu yayi beno ke tuba, “Mu kele ya kukangama na kati ya Yesu; kasi kieleka mu ke kwikilaka ve na kubeluka ya nzutu ya Kinzambi.” Yina ke lakisa ti Yandi kele kuna ve.

<sup>72</sup> “Mu ke kwikilaka na Yesu; ke kwikilaka ve na Mpeve-Santu na kilumbu yayi, ve mutindu ba kuzwaka Yawu na ntangu yina.” Yina ke lakisa ti Yandi kele kuna ve.

<sup>73</sup> Mpeve-Santu ke pesa kimbangi ya konso Ndinga Yawu ke zonza. Yandi kele muntu ya luvunu ve. Yandi kele na boma ya muntu ve to ya organisation ve. Yandi ke na nsatu ya kufukama ve na ntwala ya muntu. Yandi ke zonza, mpe na manima Yandi ke vwanda na yawu.

Kana bayina kele ya kuzanguka, mpe ya kupola, mpe bayina tangaka, to mutindu beto ke bokilaka yawu, bantu ya nene ya bimvwama, kana bawu zola ve kuzwa Yawu, “Nzambi kele na kiyeka na matadi yayi kubasisa bana samu na Abraham.” Yandi ke baka babandi, mpe bantu yina ke salaka malafu na mayuya, mpe nyonso yankaka, mpe kubasisa yawu. Nzambi lenda sala yawu, mpe Yandi ke na kusalaka yawu. “Nzambi kele na kiyeka na matadi yayi kubasisa bana samu na Abraham.” Muntu ke sala yawu, samu ti Yandi kele Nzambi.

74 “Kana beno kangama na kati ya Munu, mpe Bandinga ya Munu na kati ya beno, beno lomba yina beno zola,” samu ti beno ke na kulombaka Ndinga ya Yandi, mpe Ndinga ya Yandi kele Luzingu. Zonza yawu. Kana Nzambi tubaka yawu, mpe beno ke kwikila ti Yandi tubaka yawu, Mpeve-Santu ke pesa kimbangi ti Ndinga kele kieleka, kuna, beno bawu yayi, mpangi. Beno zonza yawu; yawu yayi. “Beno tuba na mongo yayi, ‘Katuka.’ Beno sala ntembe ve na kati ya ntima ya beno, kasi beno kwikila ti yina beno me tuba ke salama.” [Mpangi Branham me bula maboko ya yandi kintwadi bambala tatu—Mu.] Ve ti beno ke zonza, kasi Tata yina ke zingaka na kati ya beno; Yandi ke zonza. Ya kele beno ve yina ke na kuzonzaka na mongo, ya kele Tata yina kele na kati ya beno, ke na kuzonza na mongo yango. Ya fwana katuka. “Mazulu nyonso mpe ntoto ke luta,” Yandi tubaka, “kasi Mpeve ya Munu ve ke . . . to Ndinga ya Munu ke luta ve.” Kieleka, Yawu ke luta ve. Tata!

75 Ntangu yayi, “Bisalu yina Mu ke salaka.” Nzambi kele na kati ya Dibuundu ya Yandi, samu na kulandila bisalu ya Yandi. Ya kele samu na yina Yandi fidisaka Mpeve-Santu. Ntangu yayi, Yandi zaba yawu. Yandi, Yandi zabaka ti ya ke vwanda ve, ya zolaka salama ve mutindu yina, na yawu na mutindu yankaka, na yawu Yandi zolaka fidisa. Tata fidisaka Mwana, me tula nyonso yina na kisa- . . . Mwana na kati ya beno. Mpe bisalu mosi yina Yandi salaka, bisalu ya kieleka mosi ntangu yayi yina Yesu salaka, beno ke sala mpe, Dibuundu.

Beno ke zola kusala bisalu ya Nzambi? [Dibuundu me tuba, “Amen.”—Mu.] Yesu tubaka, “Kana beno zola kusala bisalu ya Nzambi, beno kwikila na Munu.” Yinki mutindu beno ke kwikilaka na Yandi? Beno lenda ve kusala yawu tii beno ke kuzwa Mpeve-Santu.

76 Samu ti, muntu ve lenda tuba Yandi kele Mwana ya Nzambi; beno ke na kutuba yina muntu yankaka me tuba. “Biblia ke tuba ti Yandi kele Mwana ya Nzambi; mu ke kwikila Biblia.” Mbote mingi. “Biblia ke tuba Yandi kele Mwana ya Nzambi; mu ke kwikila Biblia. Pasteur tubaka Yandi kele Mwana ya Nzambi; mu ke kwikila pasteur. Mama tubaka Yandi kele Mwana ya Nzambi; mu ke kwikila mama. Nkundi ya munu tubaka Yandi kele Mwana ya Nzambi; mu ke kwikila nkundi ya munu.”

Kasi mutindu kaka ti mu lenda tuba ti Yandi kele Mwana ya Nzambi, kele ntangu Mpeve-Santu ke kota na kati mpe ke pesa kimbangi ya Yandi mosi, kuna mu ke zaba ti Yandi kele Mwana ya Nzambi. [Mpangi Branham me konkota na zulu ya chaire bambala yiya—Mu.] “Muntu ve lenda bokila Yesu ‘Klisto,’ kaka na nzila ya Mpeve-Santu.”

77 Huh! Muntu ve na kuzonzaka na nzila ya Mpeve ya Nzambi ke bokila Yesu ya kusinga, to ke tuba ti Yandi vwandaka kima

mosi kilumbu yina mpe kima yankaka bubu yayi. Yina ke sala Yandi kulemba mpe kutekita. Ve, tata.

Yandi kele mutindu mosi mazono, bubu yayi, mpe kukondwa nsuka. Konso mpeve ya kieleka ke pesa kimbangi ya yawu. Mbote mingi.

<sup>78</sup> Ntangu yayi, Yandi tubaka, “Bisalu yayi yina Mu ke na kusalaka beno mpe ke sala,” Jean 14:12, ntangu yayi, bisalu mosi.

“Oh,” ba ke tuba, “dibuundu ke na kusalaka kisalu ya nene mingi bubu yayi.” Na wapi mutindu?

Yandi tubaka, “Bisalu yina Mu ke salaka.”

“Yina,” ba ke tuba, “mbote, beto kele na ba-missionaire bisika nyonso na yinza, ya kele kisalu ya kulutila nene.”

<sup>79</sup> Kasi Yandi tubaka, “Bisalu yina Mu ke salaka.” Ntangu yayi beno sala yawu, beno sala ntete yawu, na manima beno zonza na ba-missionaire.

<sup>80</sup> Bubu yayi, na kuzonzaka awa mwa bilumbu me luta na Musulman mosi, yandi tubaka, “Mohammed kele ya kufwa.”

“Ya kele kieleka, yandi kele na kati ya ntoni, kasi kilumbu yandi ke vumbuka na lufwa.” Yandi tubaka, “Kana yandi vumbuka na lufwa na ntoni, yinza ya muvimba ke zaba yawu na kati ya banganga makumi zole na yiya.” Yandi tubaka, “Beno bantu ke tubaka ti Yesu vumbukaka na lufwa bamvula mafunda zole, mpe ve mosi na zulu ya tatu ya bantu zaba ntete yawu.”

Yina kele samu ti beno ke na kuzonza landila kumona ya yawu na mayele. Beno ke na kuzonza landila kumona ya lukolo to ya ndongosolo.

Kana nyonso yayi, ya dibuundu ya nene ya Nzambi, kubaka Katolika, Misyoni, bawu nyonso kintwadi, ti me kuzwa Mpeve-Santu, yinza yayi zolaka vwanda ya kuvwanda ngolo na Buklisto; ya zolaka vwanda ve na kima mutindu communisme; ya zolaka vwanda ve na kima mutindu kuswana, to kuyinasana, to mambu ya yimbi, to musoki. Yesu zolaka vwanda ya kuvwanda na Kiti ya Yandi ya Kimfumu, mpe beto zolaka tambula na bapaladiso ya Nzambi, na Luzingu ya Kukonda nsuka, kuzinga ya kukondwa nsuka; zolaka vumbuka na lufwa yimeni na nzutu ya malu-malu, ke tambula bisika nyonso, ata mbala mosi ve kununa, ata mbala mosi ve kuzwa nsuki ya mpembe, ata mbala mosi ve kuvwanda ya kubela, ata mbala mosi ve kuzwa nsatu; kutambula na kati ya bakyese ya Mfumu, kuzonza na bibulu. Mpe, oh, wapi kilumbu! Kasi beto me sala nyonso yankaka na lweka ya yina Yandi. . .

<sup>81</sup> Yandi tubaka, “Beno kwenda na yinza nyonso mpe beno longa Nsangu ya mbote.” Yinki ke salaka Nsangu ya mbote? “Ndinga kaka ve, kasi na Ngolo mpe bakumonisa ya Mpeve-



Santu.” Kusala Ndinga ya Nzambi kutalana, kele Nsangu ya mbote.

<sup>82</sup> Beno lenda ve kusala yawu. Ntangu yayi, Yesu zabaka ti, ti Yandi zolaka zinga na kati ya Dibuundu ya Yandi.

Na yawu, Yandi zabaka ti beto ke kuzwa balukolo ya mayela. Mpe beno ke kuzwa ata mbala mosi ve Yayi na lukolo ya mayela. Ba ke telemina Yawu. Samu ti, nyonso yina bawu zaba kele mwa malongi ya mayela ya muntu, mwa credo ya bantu to dénomination na yina bawu zola ku—kuzingila. Na yawu ba ke—ba ke tula beno na kati ya yawu mpe kusala beno binama ya nzutu yango, mpe, mpangi, beno ke tanga mwa bima yina me katuka na credo ya bantu yina ke monana mutindu ti ya vwandaka kaka ya kulunga. “Dibuundu ya nene ya santu, mama, yandi tulaka ngolo na kubula mingi, yandi tulaka ngolo na bafimbu mingi.” Mutindu mosi dyabulu; ba me losa yandi na ngaanda bisika nyonso yina kele, na kutala, mpe yandi ke na kulandilaka kaka mutindu kaka mosi. Yinga, tata. Oh, ba ke meka na kutanga yawu.

<sup>83</sup> Na yawu Yesu zabaka ti ya ke vwanda na kunikisa ya nene ya mayela kaka mutindu ya vwandaka na bilumbu ya Yandi, na kati ya kusukula banzungu mpe bandonga, mpe kulwata bilele, mpe kubalula ya bankingu, mpe nyonso mutindu ba vwanda sala, bima nyonso yankaka yina ba zolaka sala. Yandi zabaka ti bawu zolaka sala yawu, na yawu Yandi tubaka, “Ntangu yayi beno vingila kaka mwa minuti. Mu ke bika beno bansiona ve, Mu ke kwiza dyaka na kuvwanda na beno. Na yawu,” Yandi tubaka, “bisalu yina Mu ke salaka, beno ke sala mpe.”

<sup>84</sup> Lukanu ya kufidisaka Mpeve-Santu vwandaka samu na Nzambi na kulandila na nzila ya nkonga ya bantu, na kulandila na kulakisa Nzambi na yinza. Ya kele kieleka. Na nzila ya credo ya bantu ve, na nzila ya dénomination ve; kasi na nzila ya Ngolo ya mvumbukulu ya Yandi na lufwa, na kusala Ndinga ya Yandi kieleka; na kubakaka nsilulu ya Yandi, mpe kutelama na lweka ya ndambu, mpe na kukwikilaka Nzambi; mpe kumona matuti ya ndombe kuvutuka manima, mpe Ngolo ya Nzambi kukota mpe kubaka kisalu. Amen. Ya kele yina Yandi zola. Ya kele samu na yina Mpeve-Santu kupesamaka. Ya kele samu na lukanu yina Yandi fidisaka Yawu. Beto zaba yinki Yawu kele ntangu yayi, mpe ya kele samu na yinki Yandi fidisaka Yawu.

<sup>85</sup> Na yawu, menga yankaka ve zolaka santisa bantu. Mu lenda ve kusantisa beno, mpe beno lenda ve kusantisa munu, samu ti beto nyonso zole kele ya kubutama na manima ya kuvukana ya bakala na kento. Kasi Yesu kubutukaka kukondwa kuvukana ya bakala na kento, ya kele kieleka, na yawu Menga ya Yandi vwandaka musantisi. Mpe Nzambi kulumukaka, salaka nzutu, zingaka na kati ya yawu, tsyamusaka Menga yango samu na kusantisa ya yayi, yina kieleka katulaka kundima ya disumu

mpe nsoni. Na yawu, na nzila ya lukwikilu, na kukwikilaka na Yawu, Nzambi me kulumuka mbala mosi na kati ya nzutu yango ya muntu, na kusantisa ya Menga yango, me tula yandi Nkuna ya Abraham, na nzila ya lukwikilu.

<sup>86</sup> Na kukwikilaka ti Menga yango ke kwiza, Menga yango ya kuvedila yina ke vwanda kimangu mutindu menga ya yandi, tambulaka kuna na manima “yandi vwandaka mutindu ya kufwa.” Kwikilaka Nzambi bamvula makumi zole na tanu, yandi ya bamvula makumi sambwadi na tanu, mpe kwikilaka tii yandi kumaka na nkama. Mpe Sarah, makumi sambanu na tanu, mpe kwikilaka tii yandi kumaka na makumi yivwa. “Mpe yandi vwandaka muntu mutindu ya kufwa.”

Mpe Nzambi tubaka, “Samu ti bantu kuvwanda na kivuvu na kukondwa yawu ve, matisaka yandi awa na mongo mpe pesa yandi samu na munkayulu.”

<sup>87</sup> Yandi tubaka na bisadi, “Beno telama awa na mpunda mpe beno vingila. Mwana na munu ke kwenda kuna mpe ke sambila, mpe mwana na munu ke vutuka.” Oh, yinki mutindu yandi ke sala yawu?

Abraham tubaka, “Mu me yamba yandi mutindu muntu me katuka na kati ya bantu ya kufwa. Mpe mu zaba ti Yandi yina pesaka yandi na munu, mutindu muntu katukaka na kati ya bantu ya kufwa, kele na kiyeka ya kuvumbula yandi na lufwa kana mu kangama kaka na Ndinga ya Yandi. Kukangama, mu kukangama na Ndinga ya Yandi; Yandi kele na kiyeka ya kuvumbula yandi na lufwa.”

<sup>88</sup> Kuzonzila ya Klisto ya kulunga! Yandi yayi. Mpe na nzila ya cellule ya Menga yango basikaka Mpeve-Santu, yina Yawu mosi vwandaka ya kukangama na nzutu nkumbu Yesu. Menga yango santisaka nzila, na nzila ya lukwikilu, samu na kubokila bantu ba me lemvukila, to Musolami ya Nzambi. Mpe na yina beno me ndima Yawu, mpe ti Mpeve-Santu me katula nyonso ya yimbi na beno, Yandi ke kota mbala mosi, Nzambi Yandi mosi, samu na kusala luzolo ya Yandi.

<sup>89</sup> Na yisi awa, mfumu ya kusalu ya yimbi yayi kele ntangu nyonso ya kudasuka; mpe kiboba yankaka yayi *kingandi* na lweka awa ke na kusala *yayi na yina*; mpe muntu ya kukula *yayi* ke na kuzonzila na Yawu, na kuteleminaka Yawu. Muntu ya kufulukuka na Mpeve-Santu ke telama kaka na ntwala ya yawu. Amen.

<sup>90</sup> “Mpe bawu bakulaka. Ba vwandaka bantu yina zabaka kima ve mpe yina tangaka ve, kasi bawu bakulaka ba vwandaka na Yesu.” Ya kele samu na yina Mpeve-Santu kwizaka.

<sup>91</sup> Mwa kilobi-mbisi yina vwanda lenda ve kusonika nkumbu ya yandi. Kasi yandi telamaka kuna mpe tubaka, “Nani beto ke kwikila, muntu to Nzambi?” Amen. [Mpangi Branham me bula maboko ya yandi kintwadi mbala mosi—Mu.] “Ti ya kuzabana na

kati ya beno, beto ke longa dyaka na Nkumbu ya Yesu.” Oh, wapi kibakala! Yandi zabaka ti yandi—yandi vwandaka na Yinzo na lweka kuna. Ya kele kieleka. Yandi vwandaka kizyeti mpe nzenza awa. Yandi vwanda sosa Mbanza yina ke na kwiza.

Yinki nganga-Nzambi ya luvunu yina vwandaka samu na yandi? Yandi vwandaka na yisi ya lutumu ya Nzambi ya Mazulu, yina vumbulaka na lufwa Mwana ya Yandi, Klisto Yesu, mpe fulusaka yandi na Mpeve ya Nzambi yina salaka mazulu mpe ntoto. Beno bawu yayi. Yandi vwandaka ve na boma ya yandi. Ve, tata. Lufwa. . .

<sup>92</sup> Beno tala, ntangu ba nataka mwa Étienne ya kukula yayi na ngaanda kuna, mpe ba tubaka, “Katula yina nge vwanda me tuba!”

Yandi tubaka, “Beni bantu ya yintu ngolo, mpe ya ntima mpe makutu ya kukangama, beno ke teleminaka ntangu nyonso Mpeve-Santu. Mutindu batata ya beno kusalaka, mutindu mosi beno.”

Ba tubaka, “Beto ke bula nge tii kufwa!”

Yandi tubaka, “Beni lenda ve kusala yawu kana beno. . .?”

“Beto ke lakisa nge kana beto ke sala yawu to ve!” Mpe ba bakaka matadi ya nene mpe bandaka na kubula yandi na yintu.

<sup>93</sup> Yandi talaka na zulu, mpe tubaka, “Mu ke mona Mazulu ya kufunguka. Mu ke mona kikadi kukulumuka. Mu ke mona Yesu ya kutelama na diboko ya bakala ya Kimfumu ya Yandi.” Mpe Biblia tubaka ve ti yandi kufwaka; yandi lalaka. Oh, la la! Mu lenda kaka kumona Wanzio kukulumuka, kunangula yandi mpe kubondila yandi mutindu bébé, mama, tii yandi lalaka. Oh, la la! Kieleka.

<sup>94</sup> Yina kele lukanu ya Mpeve-Santu. Ya kele samu na yina Nzambi fidisaka Mpeve-Santu. Mpeve-Santu ke kwiza samu na kupesa Ngolo. Mu kele dyaka na mwa Masonuku awa, minuti kaka. Mpeve-Santu ke kwiza samu na kupesa beno Ngolo. Mu—mu ve. . . Beni lenda tala yayi, mu me kwenda kaka ntama mingi, na nkokila yayi.

Ke pesa beno Ngolo, Ngolo na bisambu!

<sup>95</sup> Beni baka muntu yina me zinga luzingu ya mbote, kasi bawu ntangu nyonso kele ya kununga. “Oh, mu ke tuba na beno. . .” Muntu ya mbote, “Oh, kieleka, mu zola Mfumu, Mpangi Branham.” Ntangu nyonso ya kununga, ata mbala mosi ve ba me kuzwaka mvutu na bisambu.

Beni fulusa mwa kento yango na Mpeve-Santu kilumbu mosi, beno tala mbote yinki ke salama. Ntangu yandi ke kwenda na ntuala ya Nzambi, yandi kele ya kununga ve. Yandi ke kwiza na ngolo na Kiti ya kimfumu ya Nzambi, na kukwikilaka. Yandi kele na muswa samu ti yandi kele mwana ya kento ya Nzambi, na Mbutukulu.

Beno baka mwa bakala yayi, ya kufulukuka na boma, mfumu ya kisalu ke bikaka ve na kuzonza na ngolo na zulu ya yandi. Yandi ke tuba, “Vingila fyoti awa ntangu yayi.” Kima me soba, beno me mona, yandi me kuzwa Mpeve-Santu. Yawu ke pesa beno Ngolo. Luzingu ya beno ke fuluka na Ngolo.

Yawu ke pesa beno Ngolo na kuzonza.

<sup>96</sup> Oh, la la, bantu yango yina vwandaka na boma, telamaka kuna; Pierre, Jacques, Jean, Luc, mpe bawu nyonso yankaka. Ba kwendaka na kivinga ya zulu, vwanda tuba, “Oh, beto lenda dyaka ve kutuba. Bawu, kotalaka kuna, beno tala Mulongisi *Kingandi* mpe kingandi na ngaanda kuna. Beno tala Rabbin *Kingandi* mpe kingandi. Beno zaba, yandi kele na badiplome yiya ya lukolo ya nene; wapi mutindu beto ke lenda kwandi na kutelemina yandi?” Pierre tubaka, “Oh, mu me bambuka moyo na kutekisaka muntu yango mbisi kilumbu mosi. Yandi, yandi vwandaka zonza, mpe mu zabaka kaka ve yina yandi vwandaka zonzila. Oh, mu ke lenda ata mbala mosi ve kutelemina yandi.” Kasi yinki . . .

“Yinki beto lenda sala, bankundi?”

“Yandi tubaka, ‘Beno vingila.’”

“Mbote, beto me sala na kuvwandaka awa bilumbu yiya.”  
“Beto landila kaka na kuingila.”

“Bilumbu yikwa?”

“Tii.”

“Mbote, Yandi tubaka ti ya ke vwanda na kilumbu ya tanu?”

“Ata mbala mosi ve Yandi pesaka lutangu ya bilumbu. Yandi tubaka, ‘Tii.’”

Mbote, ba landilaka kaka na kuingilaka. Bilumbu yikwa? “Tii.” Bilumbu nana me luta. “Tii.” Bilumbu yivwa me luta. “Tii.”

*Mpe na nsuka ntangu kilumbu ya Pentecote kieleka kumaka, ba vwandaka bawu nyonso kisika mosi, na ntima mosi.*

<sup>97</sup> Nzambi vwandaka na zulu ya bawu, na Dituti ya tiya; Nzambi vwanda tambula na bawu, na ntoto; ntangu yayi kima yankaka zolaka baka kisika. Kima vwanda yilama na kusalama.

*. . .ba vwandaka bawu nyonso na kisika mosi, na ntima mosi.*

*Na mbala mosi me kwiza makelele me katuka na mazulu mutindu . . .mupepe ya ngolo, mpe fulukaka kivinga nyonso kisika bawu vwandaka.*

*. . .baludimi ya kabwanaka . . .tentamaka na zulu . . . bawu.*

Yinki kele *kabukaka*? “Kukabuka.” Mutindu kutekita na kuzonza, beno me kuwaka ntete muntu kutekita na kuzonza? Ba ke sala, “uh-uh-uh, oh, uh-uh,” beno me mona, ba lenda tuba ve kima. “Kabukaka, kukabuka.” Mutindu dikulu ya *kukabuka*, ya zola kutuba kima yina kele ya “kukabikisa, ya kukabuka.” Ba vwanda zonza ve. Ba vwanda zonza ve mutindu na muvusu. Ba vwanda sala kima ve kasi vwanda sala kaka makelele.

. . . *baludimi kabukaka* mpe tentamaka na zulu ya bawu, mutindu ti ya vwandaka tiya. (Oh, ba vwanda lenda ve kukanga bawu mosi!)

*Mpe bawu nyonso fulukaka na Mpeve-Santu, . . . Fiu!*

<sup>98</sup> Na manima yinki kusalamaka? Ba basikaka na bala-bala. “Wapi kisika kele Rabbin Jones? Wapi kisika kele muntu yango? Mpe wapi kisika kele kafumba ya muntu yango ya mayela ya kimuntu?”

“Nzambi vwandaka na zulu ya beto, na Moïse, na divunda ya tiya; Yandi dikisaka beto na mani, ya Zulu. Yandi tambulaka na beto bamvula tatu mpe sambanu . . . bamvula tatu mpe bangonda sambanu, awa na ntoto. Kasi ntangu yayi Yandi kele na kati ya munu. Ya kele munu ve yina ke zonza; ya kele Yandi. Mu zaba nani Yandi kele, mpe mu zaba nani mu kele. Munu dyaka ve; Yandi.”

Beno nata yandi awa! *Beno bantu ya Israël, mpe . . . beno yina ke vwandaka* na Judée, ti yayi *kuzabana na beno—kuzabana na beno, mpe beno kuwa mbote* ndinga ya munu, beno nyonso milongi mpe ba-rabbin.

Fiu! Oh! Ngolo ya kuzonza! Oh! “Bayayi kele ya kukola ve malafu!” Yandi vwanda nwanila mwa ndambu ya bantu yina, nkama na makumi zole, ya kutelemina mafunda kumi to ya kulutula.

. . . *bayayi kele ve ya kukola malafu, mutindu beno ke na kubanza, samu ti ya kele ntete* kasi *ngunga ya yivwa ya suka*.

Mu kele mulongi ya Nsangu ya mbote ya muvimba. *Kasi yayi kele yina ti zonzaka profete Joël;*

. . . *ya ke salama na bilumbu ya nsuka, me tuba Nzambi, mu ke tsyamuna . . . Mpeve ya munu (fiu) na zulu ya nsuni nyonso: mpe ya beno . . . Beno me mona Marie kuna kubina na Kimpeve, kuzonza na bandinga mpe kulandila? . . . na zulu ya nsuni nyonso: . . .*

. . . *mpe na zulu ya bisadi ya munu ya bakento mu ke tsyamuna . . . ya munu Mpeve; . . .*

[Mpangi Branham me bula maboko ya yandi kintwadi bambala tatu—Mu.]

. . . mu ke lakisa bidimbu na mazulu *na zulu, mpe . . . na ntoto* na yisi; . . . makunzi *ya tiya, mpe* mipepe *ya mulinga*:

Kuna Nzambi vwandaka na kati ya bantu ya Yandi. Amen.

“Mbote, ntangu yayi, wapi diplome yina nge me kuzwa? Wapi kisika, na wapi lukolo nge me katuka?”

<sup>99</sup> “Yina ke sala ata luswaswanu mosi ve malu-malu yayi.” Oh, yandi me banda na kutsyamuna Masonuku.

David talaka yandi na ntwala! . . . *Mfumu ntangu nyonso na ntwala ya munu . . .* ke ningana ve:

. . . ya kulutila *ntima ya munu* me yangalala, samu ti. . . *mpe ndinga ya munu vwandaka* na kyese;

. . . yandi ke *bika moyo ya munu ve na difelo, dyaka ve* yandi ke *ndima Muntu ya Santu* ya yandi *kumona kubola*.

. . . *ti mu zonza pwelele na beno na tata David, . . . yandi kele ya kufwa mpe ya kuzika, mpe ntoni ya yandi kele na beto . . . kilumbu yayi*.

Kasi na nzila ya profete . . . yandi tubaka na ntwala nkwezulu ya Muntu ya Kudedama.

. . . mpe ti ya vwanda ya kuzabana na beno, *ti Nzambi me sala Yesu mosi yayi, yina beno komaka na kulunsi* na maboko ya bantu ya yimbi, *nyonso zole Mfumu mpe Klisto*. Amen!

<sup>100</sup> “Bampangi, yinki beto lenda sala samu na kuvwanda ya kuvuuka?”

. . . tubaka, *Beno balula ntima, mosi na mosi ya beno, mpe kuzwa mbotika na nkumbu ya Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu*.

*Samu ti nsilulu kele samu na beno, mpe na bana ya beno, mpe na bayina kele ntama, mpe bayina nyonso Mfumu Nzambi ya beto ke bokila kieleka*. Amen.

<sup>101</sup> Ntangu nyonso yina Nzambi ke kuzwa bantu, Nzambi ke kuzwa Dibundu, Nzambi ke kuzwa Mpeve-Santu na kutambula na Yandi. Ya kele samu na yina Nzambi pesaka Mpeve-Santu. Mayele ya kimuntu ke telama; ntangu nyonso. Kasi Nzambi kele na ndambu kisika mosi. Nzambi kele na mwa Dibundu mosi yina ke landila na kukwenda na mbotika ya Mpeve-Santu, samu na kulomba Nsemo. Mpe ba ke vwanda bayina ti, na nzila ya bimbangi ya bawu, ke fundisa yinza.

Biblia me tuba ve ti Yesu tubaka, “Kyese na bayina ke na ntima ya kuvedila; bawu ke mona Nzambi?” Mpe Yandi tubaka ve, ti, “Muntu ya kudedama, basantu, ke fundisa ntoto?” [Dibundu me tuba, “Amen.”—Mu.] Kieleka.

Kimbangi ya beno bubu yayi ke nata lufundusu na ntwala ya mbanza yayi. Kimbangi ya beto ya mbotika ya Mpeve-Santu mpe Ngolo ya Nzambi, luzingu ya santu, ke nata lufundusu na ntwala ya mbanza. Ntangu yayi. . .

<sup>102</sup> “Bawu yina kele ya ntete ke vwanda ya nsuka; bawu yina kele ya nsuka ke vwanda ya ntete.” Mu ke zaba ve kima na Sankey mpe Moody, na mvumbukulu ya bawu ya lufwa. Ba ke zaba kima ve na munu, na yandi yayi. Kasi mu ke telama na yandi yayi, samu na kupesa kimbangi; mutindu mosi beno.

Mpe na nzila ya yina, na kutsyamunaka ya beno Nsemo, mpe mbotika ya Mpeve-Santu, mpe na baluzingu yina beno ke zingaka, mpe bima yina Nzambi me sala na kulakisa ti Yandi ke na kusalaka awa; mpe na mayela ya bawu ya kimuntu, ke kwenda ntama na Yawu; ba ke fundisama na bansantu. Ba kele ya kufundisa yimeni. Ba me luta yawu yimeni. Oh, la la!

<sup>103</sup> Mu vwanda zonzila na Ngolo ya bisambu, Lulendo ya kuzonza, Ngolo samu na luzingu ya santu. Amen. Ya kele yina Mpeve-Santu ke sala.

<sup>104</sup> Bayankaka ya beno bantu ke tambula, ke tuba, “Mbote, mu lenda kaka ve kubika kunwa malafu. Mu lenda kaka ve kubika *yayi*.”

Mpeve-Santu ke kwiza kuzinga na kati ya beno, samu na kusala “bakulenda ve” nyonso yayi kuvwanda ntama na beno. Ya kele kieleka. Ke sala bakento kubika kuzenga nsuki ya bawu, ke sala bawu kubika kulwata bakupe mpe bapantalo. Kukondwa daimbu ya kutuba. Ke sala bawu kubika kutuba yimbi ya muntu yankaka. Oh, yinga, ya kele samu na yina Yawu kele, na kusala beno luzingu ya santu. Yawu ke landa malongi ya Biblia konso ntangu.

<sup>105</sup> Kento mosi ke tuba, “Ndungutila kele kaka mingi; mu fwana lwata kaka yayi. Ya ke sala munu yintu mpasi kana mu bika nsuki ya munu kukula.”

Kasi ya kele na bima yankaka ya kutuba ve na Mpeve-Santu. Yawu kele kuna samu na kusala yawu mutindu yina. Yawu ke landa Ndinga kieleka kaka. Ya kele yina Mpeve-Santu ke kusala.

Yawu ke sala beno bakala kubalula yintu ya beno na bakento yina kele ya kulwata ndambu kipene, mpe kubika kulula bawu, mpe bamambeke ya dibuundu. Ya kele yina Yawu ke sala.

<sup>106</sup> Yawu ke sala beno kubika kunwa tabaka mpe kunwa malafu, mpe kuvwanda. . . zola kuvwanda muntu ya kupesa boma. Yawu ke basisa yawu na beno. Yawu ke kulumusa beno ntangu beno ke sala yawu. Ya kele samu na yina Mpeve-Santu kele. Yawu kele samu na luzingu ya santu. Ya kele kieleka. Ke sala beno kubika kutonga. Ke sala beno kubika kubula bansaka ya

bakalati, kubula zeke, mpe bima nyonso yayi yina beno ke salaka na nsongi.

Yawu ke sala beno kubika kulandila mutindu beno ke na kusala, kuzinga kukondwa kieleka na kento ya beno. Ya kele yina Yawu ke sala. Ya kele kieleka. Yawu ke sala beno kubika kuzola kukwela kento ya muntu yankaka. Ya kele kaka kieleka.

Ya kele samu na yina Yawu kele. Yawu kele samu na kusala beno kuzinga luzingu ya santu. Ya kele samu na yina kele Ngolo ya Mpeve-Santu, “na kuvwandisa bampusa ya beno na bima ya Zulu,” kisika Nzambi kele na . . . ? . . . dibanza ya Klisto na kati ya beno. Beno lenda ve kukusadisa na kumonaka bima yina; ntangu beno ke tala na yawu, beno balula yintu ya beno. Ya kele kieleka. Ya kele na kusala beno.

<sup>107</sup> Beno ke tuba, “Mu lenda ve kusala yawu. Oh, mu lenda kaka ve kusala yawu.” Kieleka, *beno* lenda ve.

Kasi Mpeve-Santu ke kwiza samu na lukanu yina. Ya kele yina Yawu salaka. Yawu ke kwiza samu na kubasisa yawu na beno, bifu nyonso ya ntama yina mpe yina beno ke na kusala.

Kutonga ya ntama yina, kukukabuka nge mosi, na kutubaka, “Nkembo na Nzambi, mu kele Méthodiste, mu kele na kima ve ya kusala na ba-exalté” yina. Mpeve-Santu ke kwiza samu na kubasisa yawu na beno.

<sup>108</sup> “Mu kele Baptiste. Mu kele Presbytérien. Mu lenda kwenda ve na mwa nkonga ya ntama yina ya ba-exalté.” Mpeve-Santu ke kwiza samu na kubasisa ngolo nyonso yina na beno. Ya kele yina Yawu salaka. Yawu ke sukula beno na kati ya Menga; ke woma beno. Ya kele samu na yina Yawu me kwiza sala.

Yawu me kwiza samu na kusungika beno. Yandi tubaka, “Beni sungika bisika ya kuvimba.” Ya kele samu na yina Yawu me kwiza sala; na kusungika yawu. “Kusala bisika ya zulu kukuluka; kusala myongo nyonso kutalana mutindu ti bawu nyonso kele na kubinaka mutindu mwa bankombo ya babakala, mpe ti makasa nyonso ke na kubula maboko ya bawu, na beno.” [Mpangi Branham me bula maboko ya yandi kintwadi bambala yiya—Mu.] Bandeke ke yimba mutindu yankaka. Bangunga ya kyese kuwakana. Ya kele na bima yankaka ya kutuba ve. Ya kele samu na yina Yawu me kwiza sala. Ya kele lukanu ya Nzambi na kufidisaka Mpeve-Santu, na yawu beno ke sala bima yayi, ti beno ke sala . . . kutambula na manima ya Yandi.

<sup>109</sup> Ntangu yayi mu zola kunyongisa beno ve, kasi mu vwanda me tuba na beno ti mu kele awa na dibanza ya kusungama mingi. Samu na kukondwa kupesa beno mpasi, mbala na mbala mu ke katukila nzila kisika mosi; mpe kuvwanda na Kieleka, kasi kuvwanda kuna mpe kusala yawu na mutindu ti ya ke sala beno mpasi mingi ve.



<sup>110</sup> Kasi mu zola kutuba na beno kima. Kana Biblia me tuba ti ya kele yimbi na kento na kuzenga nsuki ya yandi, mpe beno ke tuba ti beno ke na Mpeve-Santu mpe kuna kuzenga nsuki ya beno, mu ke kumiyufula kana beno ke na Yawu. Beno dasuka ve; kana ve, yina ke lakisa kaka ti ya kele na kidimbu yankaka na ntwala ya beno.

<sup>111</sup> Kana Biblia me tuba ti ya kele yimbi samu na kento na kulwata kinkuti yina kele ya bakala, mpe beno ke lwata mwa ba-salopette mpe bapantalo ya ntama yayi awa na bala-bala, beno bakento ya kukula! Mu banza ti samu na mwa bana ya ke vwanda nyonso. . . kima, yina bawu ke sakana na mwa bana ya babakala mpe nyonso. Kasi, beno tala, ntangu beno—ntangu beno kele bakento ya kukula, bamvula kumi na tanu, kumi na sambanu, kumi na nana, tii mvula ya nkooko ya kento, awa na bala-bala! Mpe Biblia ke tuba, “Ya kele ya kulutila yimbi na meso ya Nzambi,” na kento na kulwata bima yango. Mpe beno ke lwata yawu, na mutindu nyonso, mpe beno ke tuba beno kele na Mpeve-Santu? Mu ke kumiyufulaka bantangu yankaka. Mpeve-Santu ke landa Ndinga ya Nzambi na mukanda.

Mpe mulongi na manima ya kilongolo, yina kele na lemvo mingi ve na kulonga Yawu, mu ke sala ntembe ti yandi kele na Yawu. Ya kele kaka kieleka! Mbote, ya kele samu na yina Mpeve-Santu kele.

<sup>112</sup> Yawu kele samu na kupesa kukusa na mulongi. Yawu kele samu na kupesa busantu na nkonga. Yawu kele samu na kusungika Dibundu. Yawu kele samu na kunata kimosi ya Kimpeve. Yawu kele samu na kuvukisa beto kintwadi na Ngolo. Yawu kele samu na kuvukisa beto kintwadi na zola, zola ya bumpangi.

Mu ke kipe ve kana beno kele Méthodiste, Baptiste, Presbytérien, muntu ya Luther, nyonso yina beno kele, kana beto nyonso na nzila ya Mpeve-Santu mosi kubotamaka na kati ya Nzutu mosi, mpe me kuma binama ya Nzutu ya Yesu Klisto. Ya kele ve. . . ya kele na kima ve ya bubu yayi, kima ve samu na ntangu ke kwiza; nsatu, nzala; kima ve lenda kabisa beto na zola ya Nzambi, zola ya Klisto, “zola ya Nzambi yina kele na kati ya Klisto,” samu ti beto kele ya kubutama na Mpeve ya Yandi, ya kusukula na Menga ya Yandi. Beto kele kivangu ya malu-malu. Ya kele yina Nzambi kwizaka sala. Ya kele samu na yina Mpeve-Santu kele. Yinga, tata. Ya kele na yina.

<sup>113</sup> Ntangu yayi, bankundi, beno tala munu, na kizizi. Maboko mingi kunangukaka, ti beno vwandaka na Mpeve-Santu; beno me mona, kieleka, ya vwandaka. Oh, ntangu yayi mu ke—mu ke sala kaka mpasi mwa fyoti kaka awa. Yayi ke na kubakamaka na bande. Kasi beto ke baka mingi ya yawu mbasi na nkokila.

Kana beno ke tuba ti beno kele na Yawu, mpe ke kumifundisa na bima yayi, mu ke kumiyufula yinki ke twadisaka beno. Ata

mbala mosi ve ti Nzambi ke twadisa beno na ngaanda ya Ndinga. Yandi ke kanga beno na Ndinga, samu ti yina kele misiku ya Yandi mosi Nzambi, ya Dibuundu ya Yandi, samu na bantu ya Yandi, samu na bakento, mpe samu na bakala.

<sup>114</sup> “Mbote,” beno ke tuba, “ya ke sala munu mpasi ve na kusala *yayi to yina*.” Ve? Ndinga ke tuba ti ya ke sala.

Mpe kana Mpeve-Santu kele na kati ya beno, Yawu ke twadisa beno kaka na Ndinga. Ya ke vwanda na bima yankaka ya kutuba ve. Nzambi ke salaka bansobolo to bima yankaka ya kutuba ve. Yandi ke sala kitambi mpe beno ke dyata yawu. Kaka yina. Ya kele yina ya kele na muntu nyonso. Beno ke kwiza mutindu mosi.

<sup>115</sup> Pierre tubaka, “Beno balula ntima, mosi na mosi ya beno; beno botama, mosi na mosi ya beno, na Nkumbu ya Yesu Klisto samu na lemvo ya masumu ya beno, na yina beno ke kuzwa dikabu ya Mpeve-Santu.” Beno me mona? Ya kele yina. Beto fwana vwanda mosi na nzila yango.

<sup>116</sup> Ntangu yayi mu zola kusala beno mpasi ve; mu zola beno mingi-mingi. Kasi, mpangi ya bakala, mpangi ya kento, beno ke na kubakula, na . . . ti mu zaba ti mu fwana kutelama na bilumbu ya nsuka na mvumbukulu ya mafwa yango, na nsungi ya bantu yayi, mpe kupesa mvutu samu na Ndinga yayi? Mpe Mpeve-Santu kulakisaka yayi, mpe munu kulonga Yawu kuna na ngaanda, wapi kisika beno ke vwanda? Wapi mutindu beno ke katukila na yawu? Beno lenda kusala yawu ve, nkundi. Ve. Ntangu yayi beno bika yawu. Nyonso yina beno ke na kusalaka yina kele yimbi, beno bika yawu.

Beno ke tuba, “Mu lenda ve.”

Na yawu beno me kuzwa ntete ve Muntu-yina-lenda na kati ya beno. Ntangu Mpeve-Santu ke kwizaka, Yandi ke pesa beno Ngolo na zulu ya yinza. Mpe kana beno . . . Beno kuwa yina Yandi ke tuba. “Kana beno zola yinza to bima ya yinza, ya kele samu ti zola ya Nzambi kele ve na kati ya beno.” Ntangu yayi, ya kele na bima yankaka ya kutuba ve. Yandi ke sala yawu pwelele, mpe beto fwana vwanda mosi na kitambi yango.

<sup>117</sup> Mu zaba ti beno ke na kubanza ti mu kele ya kutitisa. Kasi mu kele kaka ya kutitisa mingi malu-malu yayi. Beno me mona? Beno kuwa. Ya kele kieleka. Ntangu yayi beno vwanda mosi na Yawu, mpangi ya bakala, mpangi ya kento.

<sup>118</sup> Beno bika ve mwa balukolo ya nene ya mayela ya kimuntu yayi awa kutuba na beno, “Oh, ya kele kima ya ntama ya buzoba.”

Kana Yawu kele kima ya ntama ya buzoba, kuna Nzambi kele ya ntama ya buzoba. Mpe kana Nzambi kele ya ntama ya buzoba, kuna munu, mpe. Amen. Mu zola kuvwanda mutindu Yandi. Samu na yinki? Mpeve ya Yandi kele na kati ya munu, ti

bansatu mpe bampwila, ke na kubokilaka nyonso yina kele ya kuswaswana na Ndinga. . .

119 Kana bantu tuba, “Ya kele nyonso ya kulunga samu, oh, kana muntu bula mwa bakalati samu na kusakana, mpe kubula kaka samu na ba-dollar tanu to zole. Ya kele ya kulunga.” Nzambi me tuba ve.

120 “Oh, kana beno baka kaka kunwa mosi ya mbote ya malafu na bampangi, mpe ti beno kukola kaka fyoti, bantangu yankaka.”

Kasi Nzambi me tuba, “Kyadi na beno.”

121 “Oh,” beno ke tuba, “ya kele ya kulunga, Mpangi Branham. Mu—mu—mu ke zengaka nsuki ya munu samu na dyambu ya kieleka. Kento, beno zaba, bakento yankaka ke salaka yawu.” Mu ke kipe ve yina bakento yankaka ke sala. Ba kele kifwanukusu ya beno ve to ba kele bamfumu ya beno ve. Kana beno kele na Mpeve-Santu na kati ya beno, beno ke landa malongi ya Yandi ata nyonso yina bantu ke tuba na beno.

122 “Mbote, Mpangi Branham, ndungutula kele kaka mingi, mpe mu fwana lwata kaka mwa *yayi-na-yayi* ya bilele yayi.” Difelo kele ya kulutula na tiya na yawu, mpangi ya kento ya luzolo. Bika mu tuba na beno yawu. Mpe—mpe ve. Beno bambuka moyo na yawu.

123 Mpe Mpeve-Santu ke twadisa beno ntangu nyonso na Kieleka, mpe Kieleka ya Yandi kele Ndinga. “Ndinga ya Munu kele Kieleka. Ti konso ndinga ya muntu vwanda luvunu, kasi ti ya Munu vwanda kieleka.”

Mpe beno banza kaka, “ya kulutula yimbi.” Beno lenda banza?

124 Yayi kele mpova ya boma samu na mulongi na kutuba, kasi mu me kotaka na bawese ya bisika mosi kisika ya vwandaka kaka. . . Beno ke zola kaka kubasika, na kutala, ya vwandaka kaka kieleka. . . Mpe bima ya mvindu na kibaka. Mu banzaka, “Wapi mutindu na yinza bantu lenda vwanda yisi mingi?” Mpe nsunga ya ngolo ya yimbi! Mpe ntangu mu ke kotaka na bisika yango, mu ke banzaka bantangu yankaka, “Wapi mutindu ya nsunga ya ngolo ya yimbi!” Mu ke. . . Na kati kuna, mu ke kanga bambombo ya munu mutindu *yayi*, samu na kusukula maboko ya munu. Mu ke vwanda na boma ti ntangu mu ke simba dyaka, diboko ya mwelo, ti ya ke vwanda na ba-microbe ya ke tambakana mpe nyonso. Mpe mu vwandaka banza, “Oh!”

125 Kilumbu mosi, na kuvwandaka na aéroport, mu kotaka na mosi ya bisika yango, to na lagar, mu kotaka kuna. Mpe mu banzaka, “Oh, kyadi.”

126 Mpe Kima mosi tubaka na munu, “Ya kele mutindu yinza ke basikaka nsunga na ntwala ya Nzambi. Ya kele ya kulutula yimbi.”

<sup>127</sup> Mu banzaka, ntangu mu ke mona kento kutambula na bala-bala, yandi nyonso ya kukangama mutindu yina, mpe ya kulwata bilele ya bakala, ya kele mutindu ya ke talana na Nzambi. Ya kele ya kulutila yimbi, kima ya kumanga mpe ya nsunga ya ngolo ya yimbi, na ntwala ya Nzambi. Na kutala, yandi ke kwenda na dibuundu na Lumingu, mpe nyonso ya kubonga.

Kuna ke kwenda bakala mosi kuna, mpe ke kunwa malafu, mpe ke yiba, mpe ke zola mbongo, mpe ke yiba bampangi ya yandi, mpe nyonso yankaka yina, samu na kuzwa mbongo ya kulutila; mpe kusala bima yayi, mpe kubula bansaka ya mbongo, mpe ke kunwa tabaka, mpe ke kunwa malafu, mpe ke vuna; mpe na manima kukwenda na dibuundu mpe kupesa kimbangi. Ya kulutila yimbi! Mvindu! Yina kele dibuundu ya mayela ya kimuntu.

<sup>128</sup> Ba ke tuba, “Mbote, mu kele ya dibuundu.” Yinga, mpe fwana bika dibuundu kubasika, baminuti kumi na tanu, samu badiakre mpe nyonso ya bawu kunwa tabaka, mpe pasteur, mpe, ntete beno vutuka na kuzwa lukutakanu. Beno tuba na munu! Beno kukabuka na konso kima ya yimbi!

<sup>129</sup> “Beni sumuna nzutu; Mu ke bebisa yawu.” Nzambi tubaka Yandi ke sala yawu. Mpe bubu yayi, cancer, ke na kusalaka makumi yivwa na kima na zulu ya nkama ya mafwa, cancer ya laka mpe ya mazafu, ya ke basika na kunwaka tabaka. “Beni sumuna nzutu; Mu ke bebisa yawu.” Kasi ba kele ya kukangama mingi na nzila ya difelo, na kulandilaka mutindu yina, ba zaba ve.

Mpe mulongi mosi ke telama na chaire na badiplome yiya, ya lukolo ya nene, ke kunwa tabaka, yandi mosi. Bika mu tuba na beno kima, mpangi. Mpeve-Santu me fidisama samu na kubokila babakala mpe bakento na ngaanda ya kima yina. Beno kukabuka beno mosi!

Mpova *dibuundu* zola kutuba kuvwanda ya “kukabuka.” “Beni basika na kati-kati ya bawu,” me tuba Biblia. “Beni simba ve yimbi ya bawu, mpe Mu ke yamba beno; mpe beno ke vwanda bana ya babakala mpe bana ya bakento ya Munu, mpe Mu ke vwanda Nzambi ya beno.” Oh, la la! Mu zola kuvwanda ve muntu ya yimbi, kasi mu zola kuvwanda muntu ya kusungama mpe kuvwanda muntu ya bukieleka. Yinga, tata. Oh, wapi kima ya boma!

<sup>130</sup> Babakala mpe bakento, wapi kisika beto me telama bubu yayi? Wapi kisika beto kele? Beto sikama.

<sup>131</sup> Nkokila yankaka yina, na mwa kiti mosi ya ntama na kati ya kivinga, (mpe mu fwana kusukisa), mwa canapé mosi ya ntama. Na manima ya kusambila bilumbu tatu to yiya, kuna mu kumaka na kisika mosi, na kukwendaka bisika nyonso, mpe kubanzaka, “O Nzambi,” mpe mu kumaka na kisika mosi tii mu vwanda zaba ve yinki ya kusala. Mu tubaka, “Nzambi,

beto me kuma na nsuka ya nzila. Mpe mu ke na kubakula ti mu me bebisa. Mu kuzwaka bambokolo ya kukwenda, mpe mu vwandaka ya kulemba, mpe zolaka ve kusala yawu.” Mu banzaka kuna ti mu lendaka kumona Mfumu ya munu kubelama na kutingunaka na mpimpa kuna, ntangu Yandi vwandaka ya kulemba mingi na mpasi mingi Yandi lendaka kutelemisa dikulu mosi na manima yankaka yina, kasi Yandi vwandaka mingi ve. . . Yandi telamaka samu na kento ya Nain, dyaka samu na mwana ya bakala yina ba nataka kuna yina vwandaka ya kufwa; tii Yandi lendaka kukwenda mpe simbaka sanduku ya mvumbi, mpe sadilaka mwa ngolo vwandaka na Yandi na kumvumbula na lufwa mwana yango ya bakala. “Mbote, wapi mutindu mu me kuma ya kulemba? Wapi dyambu na munu, Mfumu? Awa mu me banza, ‘Mbote, mu ke na kukumaka kiboba. Mu—mu lenda ve kusala yawu.’”

<sup>132</sup> Ya vwandaka na Moïse, Nzambi mosi yina mu ke sadilaka, yandi telamaka kuna, na bamvula nkama na makumi zole.

Ya vwandaka na Caleb, yina telamaka na mvula ya makumi yivwa, na mbele ya kunwana na diboko ya yandi, mpe tubaka, “Josué tulaka mbele ya kunwana yayi na diboko ya munu, bamvula makumi yiya me luta.” Kuna yandi vwandaka na makumi nana. Yandi tubaka, “Mu kele kaka muntu ya mbote bubu yayi mutindu mu vwandaka kuna.” Amen.

Mu tubaka, “Nzambi, vwanda na kyadi na munu.”

<sup>133</sup> Mu tubaka, “Mbote, tala awa, mu kele ntangu nyonso. . .” Mpe mu me baka kento ya munu (kuna na manima) na diboko, na zulu ya Biblia yayi mpe ya mwa Biblia ya yandi, mpe mu tubaka, “Cherie, mu me vwanda yimbi mingi. Mpeve-Santu me fundisa munu na kati ya munu.” Mu tubaka, “Mu ke banza na bampadi yango kuna. Mu ke banza dyaka na Hattie Wright kuna, mpe mwa bana ya babakala. Mu ke banza na yina Nzambi salaka, na kulakisaka ti Yandi vwandaka Nzambi, ti lendaka vanga.” Alleluia!

Mu banzaka, “Yandi tubaka na munu ti, bamvula me luta, ‘Mu ke bika nge ve. Ata mbala mosi ve mu ke katukila nge. Muntu ve ke telama na ntwa ya nge, bilumbu nyonso ya luzingu ya nge. Mu ke vwanda na nge. Mpe na diboko ya kumona yayi, ya ke kuma tii nge ke zaba dinsweki ya ntima. Na manima ya yawu, ya ke telama mingi-mingi na zulu.’ Mvula na manima ya yawu, ya talanaka kieleka, bisika nyonso na yinza. Awa me kwiza yayi, kisalu yankaka ya nene yayi, yina lutilaka yawu na ntama.”

Mu tubaka, “Cherie, Mu ke baka diboko ya nge. Na lusalusu ya Nzambi mpe lemvo ya Nzambi, ata mbala mosi ve ke bika dyaka munu kubebisa. Bika mu kwenda na lukutakanu ya reveil yayi awa kulonga mutindu ata mbala mosi ve ntete. Bika munu kwenda awa, kusantisa ntete munu mosi, mpe kusala nzila samu na bantu; ti masumu ya munu mosi, kubebisa ya munu

mosi kuvwanda na yisi ya Menga, bakuzimbana ya munu mosi kuvwanda na yisi ya Menga, ti mu lendaka basika mpe kutuba, ‘Beno landa munu, bampangi.’” Ya kele kieleka.

Mu ke yinaka kumona muntu kutuba, “Beno kwenda sala yawu.” Mu zola kumona muntu yina ke lakisa mutindu ya kusala yawu. Yinga, tata.

<sup>134</sup> Awa mwa bilumbu me luta, beto kuzwaka tiya na mbanza awa, Pfau Oil Company kuzwaka tiya. Ba fidisaka Bisadi ya kufwa Tiya ya Jeffersonville kuna. Mpe nkundi ya munu mosi, muntu ya mbote, ata mbala mosi ve salaka ntete na batiya ya nene mutindu yina, yandi vwanda tambula kuna, na kutubaka, “Beno fidisa mwa maza na lweka *awa*, bakala. Beno fidisa mwa maza na lweka *awa*.”

Awa me kwiza mwa nkonga ya Clarksville kuna, “ding, ding, ding, ding,” ba vwandaka kwiza na mbangu kuna. Mpe yandi tubaka, mfumu ya bisadi ya tiya me pumbuka na mbangu, me tuba, “Beno fidisa mwa maza *awa*. Beno pasula nela yayi *awa*. Beno fidisa mwa maza *kuna*.”

<sup>135</sup> Kasi na lweka yankaka ya nzadi me kwiza bisadi ya tiya ya Louisville bayina longokaka. Kisimbidi ya nene mpe kikadi vwandaka kaka me kangama ti mfumu vwandaka yimeni na zulu ya kikadi. Ntangu kikadi kumaka na zulu, yandi vwandaka na yintu. Yandi me losa soka ya yandi ntete yandi kuma, mpe me pasula nela, yandi me tuba, “Beno kwiza, bakala!” Kaka yina. Tiya kufwaka na mwa baminuti.

Ve, “Beno fidisa mwa maza *awa*. Beno fidisa mwa maza *kuna*.” Ya ke nata beno na kubanza, na mwa milongi ya mayela yayi.

<sup>136</sup> Beno kwiza na munu! Beto kwenda! Mu zaba ti Yawu kele Kieleka. Mu me meka mpe mu me mona. Nkembo! Mpeve-Santu kele kieleka. Nzambi kele mbote. Ve kumeka *awa*, kumeka *kuna*; beto kota na Yandi! Yandi kele awa. Ya kele samu na beno. Nzambi pesaka Ngolo ya Yandi na Dibuundu ya Yandi. Ve kufidisa *yayi* awa, mpe kufidisa; ata mbala mosi ve beno ke kuzwa kima. Beno belama na ntwala! Amen. Uh! Fiu!

Mu ke na kulenda dyaka ve na kumona na yawu. [Mpangi Branham me katula bineti ya yandi ya kutanga—Mu.]

<sup>137</sup> Amen! Yinki beto ke sala? Muntu nyonso yina kele ya kuvwanda awa kele ya kufuluka na kima.

Na manima mu ke sukisa; mu banza ti mu fwana, na manima ya yawu.

Beno kele ya kufuluka na kima. Beno lenda ve kuvwanda kuna kukondwa kuvwanda ya kufuluka na kima. Beno kele na luzingu na kati ya beno. Luzingu yango ke twadisaka beno, mpe luzingu yango kele ya kutwadisa na mpeve.

Ntangu yayi, beno lenda vwanda ya kufuluka na yinza, ke zola yinza to bima ya yinza. Nzambi vwanda na kyadi na beno.

Beno lenda vwanda ya kufuluka na ba credo ya dibuundu mosi, na mwa bisambu ya fyoti yina beno ke tubaka, beno ke banza ti ya kele kusambila samu na muntu mosi ya kufwa, to—to kusala mwa mutindu ya kidimbu na zulu ya beno. Nzambi vwanda na kyadi na beno.

<sup>138</sup> Mpe beno lenda vwanda ya kufuluka na nsambulu, mpe yina kele dyaka ya kulutila yimbi. Ya kele kieleka. Ya kele kieleka. Biblia ke tuba, “Na bilumbu ya nsuka ba ke vwanda misambidi ya nene, ke vwanda na mutindu ya kinzambi; ke vwanda na mutindu ya kinzambi, kasi ke manga Ngolo ya yawu: na bima mutindu yina pesa mukongo.”

Kana beno kele ya kufuluka na nsambulu, beno kele na mawa; kaka nsambulu, yimeni. Kana beno kele ya kufuluka na ba credo ya bantu, beno zaba ve yinki beno ke na kutuba. Kana beno kele ya kufuluka na yinza, beno kele ya kufwa meso.

<sup>139</sup> Mpe kuna, dyaka, beno lenda vwanda ya kufuluka na Mpeve-Santu. Amen. Mu banza ti beno kele. Mpe, kana beno kele ve, mu banza ti beno ke kuzwa kufuluka. Mpe kana beno kele ya kufuluka na Mpeve-Santu, yinki ke na beno? Beno ke na Ngolo. Beno ke na zola. Beno ke na ngemba. “Mu ke pesa beno ngemba ya Munu; Mu ke pesa beno ve, mutindu yinza ke pesaka.” Beno ke na ngemba. Beno kele ya kutula kinyemo. Beno ke na kidimbu. Amen. Beno ke na kupema. Beno ke na kyese yina beno lenda kubangula ve, mpe ya kufuluka na nkembo. Beno kele ya kukangama ngwi. Oh, la la! Ya kele yina beno kele, na Mpeve-Santu. Beno ke. . . Kana beno kele ya kufuluka na Mpeve-Santu, “Beno me luta lufwa na Luzingu,” beno ke vingila mvumbukulu ya mafwa ya nene na bilumbu ya nsuka.

<sup>140</sup> Na yinza ke kwiza, na nzila ya Mfumu ya beto Yesu Klisto, mpe yina ke mona Yandi kukwiza na nkembo mpe bunene, “Mubu ke basisa mafwa ya yandi.” “Banzutu ya kubola ya bayina ya kulala na kati ya Yandi ke. . .”

“Ya kulala na kati ya Yandi.” Wapi mutindu ba ke kotaka na Yandi? “Na Mpeve mosi beto nyonso kele ya kubotama na kati ya Nzutu mosi.”

“Banzutu ya kubola ya bayina kele ya kulala na kati Yandi ke soba mpe ke kuma mutindu nzutu ya Yandi Mosi ya nkembo, na yina Yandi lenda yala na bima nyonso na Yandi mosi.”

“Mu kuwaka ndinga na Mazulu,” kutuba Jean, “yina vwanda tuba na munu, ‘Sonika, “Kyese kele na muntu ya kufwa yina kufwaka na kati ya Mfumu. . .”’” Yinki mutindu beno ke kota kuna? “Na Mpeve mosi beto kele ya kubotama na kati ya Nzutu.” [Mpangi Branham me bula maboko ya yandi kintwadi mbala mosi—Mu.] ““ . . yina ke kufwa na kati ya Mfumu tii bubu yayi;

samu ti ba ke pema na bisalu ya bawu; mpe bisalu ya bawu ke landa bawu.””<sup>1</sup> Hum!

Ya kele samu na yina Yandi fidisaka Mpeve-Santu. Oh, kivuvu ya lusemo, Yesu kele ya munu! Mu kele na kati ya Yandi, mpe Yandi kele na kati ya munu; Tata na kati ya Yandi, mpe Yandi na kati ya Tata; mpe Tata na kati ya munu, mpe munu na kati ya Yandi.

Yesu kele ya munu!

Oh, wapi luwu ya ntete ya nkembo ya Kinzambi!

Mu kele kibiyadi ya mpulusu, yina Nzambi futaka,

Ya kubutama na Mpeve ya Yandi, ntangu mu yobilaka na kati ya Menga ya Yandi.

Amen. Mu lenda sobisa yawu ve. Oh, la la!

Ba-rubis mpe badiama, mpe mbongo mpe wolo,

Basanduku ya Yandi kele ya kifuluka, Yandi kele na bimvwama ba lenda tanga ve.

Samu ti mu kele mwana ya Ntinu!

Mu kele mwana ya Ntinu!

Na Yesu Mvulusi ya munu,

Ke sala munu mwana ya Ntinu!

<sup>141</sup> Amen mpe amen. Mu ke tekisa yawu ve. Mu ke tekisa yawu ve. Mu ke na zole to tatu dyaka ya Masonu- . . .

Na manima, beno tala Masonuku yankaka. Ntangu—ntangu beno kele ya kifuluka na Mpeve-Santu, ya kele bima beno ke kuzwa. Na manima yinki beno kele, samu na yinza? Nzenza. Mu zaba ti ntangu me kuma ntama, kasi ata mbala mosi ve ti ntangu me luta samu na yayi. [Mpangi Branham me bula maboko ya yandi kintwadi mbala mosi—Mu.] Nzenza! Oh!

Beto kele bizyeti mpe beto kele banzenza awa,  
Beto ke na kusosa mbanza yina ke na kwiza,  
Maswa ya kuvuukisa ke na kwiza ntama mingi  
ve,

Samu na kuvukisa Balupetu ya Yandi na Yinzo.

<sup>142</sup> Mu lenda kuwa kuningana ya maza kuna na Nzadi ya Ohio, ntangu mu vwandaka mwa mwana ya bakala ya kukula ya mulongi, na kutala ya bamvula kumi na zole, mu vwanda yimbaka yawu kuna. Mpe mu kuwaka, mu talaka na zulu ya munu, mpe kuwaka Ndinga, kutuba, “Tala na zulu.” Awa me kwiza Nsemo yango ya nene yina ya kutentama kaka kuna, me kulumuka na kukwizaka na munu, mpe tubaka, “Mutindu Jean Mubotiki kufidisamaka na kufungula nzila na Nkwizulu ya ntete ya Klisto, nge ke kuzwa Nsangu yina ke fungula nzila na Nkwizulu ya zole ya Klisto.”



Oh, yinki mutindu mu zolaka kwikila yawu? Kasi ya kusalamaka kaka. Mpe na nkokila yayi batiya ya reveil ke na kupela bisika nyonso mpe bisika nyonso na yinza. Dibuundu ya nene ya Nzambi yina ba me lemvokila me telama Yandi mosi na kubasika na kisika yango, mpe bansamunu ya nene ya lunyakusu, mpe bidimbu, mpe mambu ya ngitukulu, mpe bimangu, na kulakisa nkwezulu.

<sup>143</sup> Beno kele muntu ya yinsi yankaka, mpe beno kele nzenza. Beno ke sala bima ya ngitukulu, ya mutindu yankaka na yina beno vwanda salaka. Beno ke sala mutindu beno vwanda salaka ve. Bantu . . . Mpeve-Santu, ntangu Yawu ke kwizaka na zulu ya beno, mpe ti beno me fuluka na Mpeve-Santu, beno ke kipe ve bima ya yinza. Beno ke kipe ve bima yina ke kwamisa beno. Beno ke kipe yawu ve. Kuna beno ke kuma kivangu ya bansalulu ya ngitukulu, mwa kivadangu ya yimbi, samu na bawu, mwana ya ngononi yina pasukaka na yinzo ya nsusu; yina mu longaka, *Mpe Ntangu Ngononi Ke Ningisaka Yinzo Ya Yandi*. Beno kele kivangu ya kuseka, samu na bawu.

Kasi, oh, la la, beno ke na kutambula Nzila ya Ntinu! Amen. Oh, ya kele Nzila ya Mazulu. Mpe mu ke na kutambula Nzila ya Ntinu.

Ba ke tuba, “Beno tala exalté yina, mwa kivadangu ya yimbi yina. Beno tala mulongi ya exalté yina.”

<sup>144</sup> Mulongi mosi ya kuzabana ya Méthodiste vwanda me tuba na muntu mosi bubu yayi, na Louisville, yandi tubaka, “Mu ke zola kusadisa Mpangi Billy, kasi beno zaba yinki mu ke sala? Mu fwana kukangimisa laka ya munu na ngaanda.” Beno fwana kukangimisa laka ya beno ve samu na munu.

Yandi kangimisaka luzingu ya Yandi samu na munu. Amen! . . .? . . . Kaka na kutambulaka Nzila ya Ntinu, kaka yina. Oh, la la! Ya kifuluka na Mpeve ya Yandi! Ya kubutama na Mpeve ya Yandi! Ya kusukula na kati ya Menga ya Yandi! Aleluya! Ya kele nsayi!

<sup>145</sup> Mpe dyaka kima yankaka, samu na yinki, yinki ke sala beno kusala yawu? Beno kele ntete muntu, kasi yinki ke sala beno kusala yawu? Ya kele samu ti beno me kwiza, beno, Mpeve ya beno me katuka na zulu. Ya kele Nzambi na kati ya beno.

<sup>146</sup> Ntangu mu kwendaka na Rome, mu talaka ti bawu, mosi na mosi ya bawu, vwandaka na mpeve ya Rome. Ntangu mu kwendaka na Grèce, bawu nyonso vwandaka na mpeve ya Grèce. Mu kwendaka na Angleterre; bawu nyonso vwandaka na mpeve ya Angleterre. Ntangu beno ke kwenda bisika, beno ke tala . . . Dyaka beno ke tala mpeve ya Amerika; ya kele ya boma.

<sup>147</sup> Ntangu mu kwendaka na bantungulu ya badyamu ya yisi ntoto ya nene ya Ba-wanzio Santu ya Rome, ba vwandaka na kidimbu na zulu kuna, “Lemvo ya beno, bakento ya Amerika, beno lwata bilele, samu na kuzitisa mafwa.” Mpeve ya Amerika.

Beno tala bawu mbote ntangu bawu ke basikaka na mpepo, mpe bawu ya kulwata mwa bilele, mpe bantu nyonso ke vwanda na kutala bawu, mpe awa ke kwiza Miss Amerika. Yina kele mpeve ya Amerika. Beno lenda tuba kisika yandi me katuka; ya kulwata bilele ya lumingu, bakala, na mwa yimbwa mosi ya fyoti ya kukula yina kele na miyoyo yina yandi ke na kubendaka na manima ya yandi. Ya ke kieleka. Oh, yinga, yandi ke. . . Yandi, yandi kele Amerika, Miss Amerika; yandi ke kwenda na ntuala, beno zaba, ke sala ba-pose mutindu yayi. Samu na yinki? Yandi ke na mpeve ya Amerika. [Mpangi Branham me konkota bambala sambanu na zulu ya chaire—Mu.] Kasi Yesu tubaka, Yandi pesaka kimbangi na kuteleminaka yawu kilumbu yina, Yandi tubaka, “Beno kele ya ntoto yayi na yisi awa. Mu me katuka na Zulu.”

Mpe kana beno ke na Mpeve ya Klisto na kati ya beno, beno kele ya Zulu, na yina beno kele nzenza awa.

<sup>148</sup> Kasi beno ke na luzingu ya kisika beno me katuka. Ya kele yina mu ke na kumeka na kutuba. Muntu ya Rome kwiza awa, yandi kalata yintu ya yandi; mpe muntu ya Allemagne ke kwiza awa; muntu ya Amerika ke kwenda kuna. Samu na yinki? Beno ke na bampeve ya bayinsi yango kisika beno ke katukaka.

Ya kele samu na yina beto kele mingi ya kuswaswana na yinza. Beno kele ya Zulu. Beno me butama. Beno kele—beno kele muntu ya yinsi ya Kimfumu yankaka. Beno ke kwikila yawu? [Dibuundu me tuba, “Amen.”—Mu.] Ya kele yina Mpeve-Santu kele, ya kele samu na kusala beno muntu ya yinsi ya Kimfumu ya Nzambi.

<sup>149</sup> Na yina, kana beno kele muntu ya yinsi ya Kimfumu ya Nzambi, wapi mutindu Yawu ke sala beno kusala? Mutindu Nzambi ke salaka na kati ya Kimfumu ya Yandi. Ntangu yayi, yinki Nzambi ke salaka na kati ya Kimfumu ya Yandi? Ya kele busantu, ludedomo, mabanza ya kuvedila, dibanza ya kuvedila; Ngolo mpe zola, kukwenda na bayina kele ya kuzimbana, kubelusa bambevo, kusala bimangu, kusala bima ya nene. Kuna, samu na yinza beno ke talana kilawu, mpe bawu ke tuba, “Bantu yayi yintu ya bawu ke tambula mbote ve.” Beno me mona? Kasi beno kele muntu ya yinsi ya Kimfumu.

<sup>150</sup> Masonuku mosi dyaka, kana beno zola kusonika yawu, Jean 12:24. Mu ke tanga beno yawu na mbangu. Yesu tubaka:

. . . kana *mbuma ya blé kubwa na ntoto* . . . kana yawu kufwa, yawu ke basisa ve luzingu yankaka.

Ntangu yayi, beno tala, noti mosi ya nsuka ntangu yayi. Mpe beno bambuka moyo, na yina, ya kele kaka . . . Ntangu yayi, samu na beno bantu, ya kele ngundi mpe mfunu, mpe mfunu mingi mpe musiku, ti beno kuzwa Mpeve-Santu ntangu yayi. Samu ti, kana ve, beno ke lenda ve kukwiza na mvumbukulu ya lufwa.

Ntangu yayi beno tala mbote. Nzambi lenda ve kufwa misiku ya Yandi. Beto zaba yawu. Yandi ke landaka misiku ya Yandi.

<sup>151</sup> Ntangu yayi, mbuma ya blé, to mbuma, beto ke baka, mutindu Yesu tubaka kuna. Kieleka, mbuma, na Biblia, mu vwanda tanga kaka yawu bubu yayi, ya ke pesa lin to mutindu nyonso ya nkuna, kasi, blé, orge, blé ya Inde, to nyonso yina, ya kele mbuma. Kasi ntangu mbuma ya blé ke kubwaka na ntoto, ntangu yayi, ya kele. . . Beto nyonso awa me monaka, zaba yayi ke salamaka. Mbuma ya blé, to mbuma ya disangu, lenda kutalana mutindu ya kulunga mutindu ya lenda vwanda, mpe beno tula yawu na kati ya ntoto, mpe kana mbuma yango. . .

Yawu ke na luzingu ya konso ntangu. Yawu ke kwenda na yisi bubu yayi, ke basika yawu mosi na mwinga; mpe ke vutuka na yisi, mpe ke mata dyaka; mpe ke vutuka na yisi. Ya kele luzingu ya konso ntangu.

Kana mbuma yango kele na nkuna ya luzingu ve na kati ya yawu, ata mutindu kitoko mingi ya ke talana, ata mbala mosi ve ti ya ke basika. Ya ke kwenda na ntoto mpe ke pola, mpe kaka yina. Ndambu ya yawu, bima ya kusadila, ba lenda sadila yawu samu na kubongisa bima na kati ya ntoto. Kasi samu na kupesa dyaka luzingu, ata mbala mosi ve ti ya ke zinga kana ti ya vwanda na luzingu ya konso ntangu na kati ya yawu. Muntu nyonso zaba yawu. Beno lenda kaka ve.

<sup>152</sup> Ya lenda vwanda na bantu zole, mosi ya bawu kele kaka, bawu nyonso zole kele kaka mutindu mosi. Mosi ya bawu lenda vwanda muntu ya mbote, yandi lenda sala bisalu ya mbote, yandi lenda sala nyonso yina; kasi kana ti muntu yina kele na Luzingu ya Seko na kati ya yandi ve, ata mbala mosi ve ti yandi ke vumbuka na lufwa. Yandi lenda ve kusala yawu; ya kele na kima ve kuna samu na kutelemisa yandi. Ya kele na kima ve samu na kubasisa yandi, ya kele na Luzingu ve. Na yawu, beno me mona, mpangi ya munu ya bakala ya luzolo, mpangi ya munu ya luzolo ya kento, kana ti muntu kubutuka dyaka, yandi ata mbala mosi ve lenda vutuka na Kimfumu yayi. Yandi lenda ve. “Kana ti Mbuma yayi ya blé kufwa na ntoto mpe kufwa.” Yandi vwanda zonzila na Yandi mosi. Kasi Yandi vwandaka, na luzingu ya konso ntangu ve, Yandi vwandaka na Luzingu ya Seko; mpe Luzingu Yandi pesaka beno, samu beno kuzwa mutindu mosi ya Luzingu.

<sup>153</sup> Ntangu yayi, kana beno ke na luzingu kaka ya kimuntu, yina ke sala beno kutambula bisika nyonso mpe kulula, “Kento yina ke zinga na kyese ya yinza kele ya kufwa na yina yandi kele moyo,” beno lenda ve kuvumbuka. Beno lendaka vwanda mwana ya kento ya kuzabana na lukolo. Beno lendaka vwanda mwana ya kento ya kuzabana na nsaka ya bakalati na kati-kati ya bantu. Beno lendaka vwanda kento ya kulutila kulwata mbote na yinsi. Beno lendaka vwanda ya kulutila kitoko. Beno lendaka

vwanda ya kulutila ya kuvangama. Beno lendaka vwanda ya kuzola mingi na bakala ya beno. Beno lendaka vwanda bima nyonso yayi, yina, ya kele mbote mingi. Kasi, mpangi ya kento, kana ti beno kuzwa Mpeve-Santu na kati ya beno, yina kele Luzingu ya Seko, na nsuka ya nzila yayi yimeni samu na beno.

Mpe mu ke kipe ve mutindu beno kele to mutindu bima yayi kele, to mutindu ya kuzabana ve to ya kuzabana beno kele, mutindu kitoko to mutindu yimbi; kana beno ke na Luzingu ya Seko, kuna beno ke zinga ntangu nyonso mpe ntangu nyonso.

<sup>154</sup> Ntangu ngonda mpe bambwetete ke zimbana, mpe ti ntoto ke dila yawu mosi na myongo mpe na ntoto ya kuyuma, mpe nyonso me—me, ya kele dyaka ve; mpe yinza kubembila mutindu muntu me kola yina ke na kwiza na yinzo na nkokila, mpe bambwetete ke manga kulezima, mpe ke kubwa na kukatukaka mazulu, mpe ngonda kubaluka na menga; mpe mwini kukuma mbwaki mpe kubumbisa kizizi ya yawu, ntangu bawu monaka Mwana ya muntu kukwiza. Beno ke lezima na ludedomo ya Yesu Klisto, samu na kubasika na dyamu mutindu ntwenya, ya kitoko mingi ya kento, samu na kubaka mpangi ya beno, mpe kuzinga ntangu nyonso mpe ntangu nyonso mpe ntangu nyonso, mpe bansungi nyonso ya Seko beno ke zinga dyaka. Ya kele samu na yina Mpeve-Santu kele.

Kana beno tala mwa kima ya fyoti kubenda, beno vtula Yawu ve.

<sup>155</sup> Yinki kele Mpeve-Santu? Nzambi na kati ya beno. Samu na yinki Yawu kele? Samu na kulandila kisalu ya Yandi na kati ya bantu ya Yandi; samu na kunata Dibuundu na Yandi kintwadi, samu na kunata Dibuundu na kisika na kilumbu yayi, ntama na manima ya bantu ya Luther, ya ba-Méthodiste, mpe bantu ya Pentecote, na kati ya kisika ya kundimama mpe lemvo ya Kuzanguka. Ti, ntangu ndambu yayi ya Dibuundu, ntangu Mpeve ke kota na kati ya Dibuundu yayi awa, yandi ke vumbuka; mpe yandi ke basisa, ke basisa bawu nyonso yina ba lemvo kilaka bayina simbaka Mpeve yango.

Bantu ya Luther yango yina telamaka kuna na nsemo nyonso yina vwandaka na bawu, na kunungisama; ba-Méthodiste yango yina kubwaka na ntoto, mpe ba losaka bawu maza na kizizi ya bawu, na yina Mpeve vwanda simba bawu na nzila ya kusantisama; bantu ya Pentecote yango, yina vwanda tambula bala-bala nyonso mpe ba vwanda bokila bawu “bantu ke tubaka na ludimi,” mpe, oh, “bantu yina zaba kutuba ve,” mpe “na ndinga ya kivadangu,” mpe nyonso yina; ba ke telama na kati ya ludedomo, na meso ya Nzambi na Kilumbu yango, kaka mutindu Biblia yayi kele awa. Kana beno ke kwikila munu na kuvwanda kisadi. . . Beno ke bokilaka munu profete ya Yandi; mu ke kumibokilaka mutindu yina ve. Kasi, beno kuwa, mu ke tuba na beno na Nkumbu ya Mfumu. Bayina kele na kati ya

Klisto Nzambi ke nata bawu na Yandi na nkwezulu ya Yandi, na mvumbukulu ya mafwa, mpe kaka bayina kele na kati ya Klisto.

Wapi mutindu beto ke kota na kati ya Klisto, bankundi?

<sup>156</sup> Na mosi ya credo ya bantu beto nyonso ke kota na kati? Ve. Na mosi ya kupesana maboko beto nyonso ke bendana na kati? Ve. Na mosi ya maza beto nyonso ke botama na kati? Ve. To na dénomination mosi beto nyonso me kota na dénomination? Ve.

Kasi, na ya Ntete ya Corinthiens 12:13, “Na Mpeve mosi, Mpeve-Santu, Mpeve ya Nzambi, beto nyonso...” ba-Méthodiste, ba-Baptiste, bantu ya Luther, ba-Presbytérien, “Beno tambula na kati ya Nsemu, mutindu Yandi kele na kati ya Nsemu, beto ke bundana mosi na mosi, mpe Menga ya Yesu Klisto, Mwana ya Nzambi, kusukula beto na mambi nyonso.” “Na Mpeve mosi beto nyonso kele ya kubotama na kati ya Nzutu, mpe beto me kuma bayina ke kota na lemvo ya Yandi.”

<sup>157</sup> Beno lenda ve kukwenda na Lusambusu. “Yandi yina ke kuwa Mambu ya Munu mpe ke kwikila.” Muntu ve lenda kwikila kana ti yandi kele na Mpeve-Santu. “Mpe yina ke kwikila na Yandi yina fidisaka Munu,” ntangu Mpeve-Santu me pesa kimbangi ya mvumbukulu ya Yandi. “Ke na Luzingu ya Seko, mpe ata mbala mosi ve ke kwiza na lufundusu, kasi me luta lufwa na Luzingu.” Yinki? Ata mbala mosi ve ti beno ke bakama na Lufundusu. Ata mbala mosi ve ti beno ke telama na Kiti ya kintinu ya Mpemba ya lufundusu.

Beno ke kuzwa lufundusu ya beno kaka awa. Beno lutaka lufundusu ya beno ntangu beto lutaka mpe tubaka, “Mu kele kima ve, mpe kulongoka ya munu kele kima ve. Mfumu, kwiza na kati ya munu, mpe baka munu mpe twadisa munu, Mfumu. Mu ke kipe ve yina yinza ya bulawu yayi ke tuba. Twadisa munu, Mfumu, na nzila ya Mpeve ya Nge.” Kuna beno kele ya kufundisa. Beno kufundisa beno mosi mutindu kilawu samu na Klisto, mpe, na ludedomo ya Yandi, Kilumbu yango beto ke telama bantu yina lenda kufwa ve na mutindu ya Yandi.

<sup>158</sup> Kaka na nzila mosi. Yinki mutindu? “Na Mpeve mosi beto nyonso kele ya kubotama na kati ya Nzutu mosi.” Mpe ntangu beno kele na kati ya Nzutu yango, lufundusu me fundisa yimeni Nzutu yango, mpe beno me ndima Yandi mutindu munkayulu ya disumu ya beno.

Beno ke tuba, “Mu me sala yawu, Mpangi Branham.”

Na yina, kana Mpeve-Santu me vutuka mpe me pesa beno kinyemo mutindu kidimbu, Mpeve yango ke nata beno na kati ya Nzutu ya Klisto. Beno ke baluka nzila yankaka, mpe beno kele kivangu ya mona na kati ya Klisto Yesu. “Beno me luta lufwa na Luzingu. Bima ya ntama me kwenda, mpe beno kele ya malu-malu na kati ya Klisto!” Amen!

<sup>159</sup> Oh, lemvo, beno bika munu kuwisa beno, mpangi ya munu ya bakala to ya kento ya Muklisto. Beno bika ve lukutakanu ya reveil yayi kuluta beno. Beno fwana kuzwa Mpeve-Santu. Yinki Yawu kele? Mpeve ya Nzambi. Yawu vwandaka samu na yinki? Samu na kunata beno, kutwadisa beno, kufulusa beno, kusantisa beno, kubokila beno na kubasika, samu na kukota na kati ya Dibuundu.

Yinki kele dibuundu, yinki zola kutuba mpova *dibuundu*? “Yina ba me bokila na kubasika, ya kukabuka.” Oh, mutindu mu lendaka baka dilongi na yawu malu-malu yayi! “Yina ba me bokila na kubasika, ya kukabuka,” bantu ya yinsi yankaka, ntama na yinza, kizyeti mpe nzenza, yina ke tuba ti awa na ntoto beto ke na mbanza ve yina beto zola kuzingila. Oh, la la!

<sup>160</sup> Mutindu Abraham, mpe Isaac, mpe Jacob, vwandaka, zingaka na batenta na yinsi. Ba vwanda tuba ba kele bizyeti mpe banzenza, nkuna ya kibyadi, kibyadi kuna; tata, kibyadi. Beto kele bankuna ya bawu. “Mpe bawu vwanda sosa Mbanza Yina Mutungi mpe Musadi vwandaka Nzambi.” Amen. Ba vwanda sosa.

<sup>161</sup> Mpe, bubu yayi, nkuna ya bawu ke na kusosaka dyaka Mbanza yina ke kwiza, na kutubaka, “Mu zola ve kuvwanda mosi na yinza yayi. Mu zola kima ve ya kusala na yinza yayi. Mu zola, mu ke na kusosa Mbanza yina kele ya kutunga bisika nyonso yiya. Mu ke na kusosa Mbanza yina kele na Luzingu ya Kukonda nsuka, kisika mwini ata mbala mosi ve ke lala, kisika kununa ke vwanda ata mbala mosi ve, kisika kitende ya ndombi ke vwanda ata mbala mosi ve na diboko ya mwelo, to ntoni na kibindu. Mu ke na kusosa Mbanza yango, Yina Mutungi mpe Musadi, Nzambi.”

<sup>162</sup> Ya kele na nzila kaka mosi samu na kutala yawu. “Ya kele na Ditadi katukaka mongo, kukondwa ngolo ya maboko, yina balukaka na kati ya yinza mpe nikaka yawu, mpe yawu kumaka mutindu blé. . . to mpusu na kisika ba ke bulaka bambuma.” Ti Ditadi yango, Klisto Yesu; Ditadi ya kubwisa yango ya yinza, Ditadi ya sakuba, Ditadi ya kuseka, ditadi ya kubwisa ya dibuundu; kasi Ditadi ya ntalu mpe ya kubenda samu na mukwikidi, Ditadi ya kivuvu, Ditadi ya kupema. Oh, la la!

Kupema! Mu zaba ti mu me luta lufwa na Luzingu. Mwela ya munu kele na kupema. Oh! “Beni kwiza na Munu beno nyonso yina kele ya kulemba mpe kele na kizitu, mpe Mu ke pesa beno kupema ya moyo ya beno.” “Kidimbu yina ba ke zonzila yimbi,” tubaka profete na Marie. Ya ke vwanda kidimbu, kieleka, ya ke vwanda. Kasi Yawu ke vwanda kivuvu. Yawu ke vwanda zola. Yawu ke vwanda kusantisama. Yawu ke vwanda kima yina beno zaba ti beno me luta lufwa na Luzingu.

<sup>163</sup> Mpangi ya munu ya bakala, mpangi ya munu ya kento; mutindu mpangi ya beno ya bakala, mutindu kisadi ya beno na

Klisto, beno bika munu kuwisa beno, na ntima ya munu nyonso. Beno bika yayi ve kuluta beno na zulu ya yintu, to na lweka ya beno, to na yisi ya beno. Beno yamba Yawu na kati ya ntima ya beno, mpe beno ke vwanda muntu ya nsayi na zulu ya ntoto.

Mu ke sila beno ve ti beno ke kuzwa fuku mosi ya ba-dollar. Ve, tata. Mpangi Léo, mu banza ti ya me vwanda na bansilulu yina mingi ntangu yayi, “mafuku ya ba-dollar,” bima yina bantu mingi ke tubaka. “Kana beno kuma Muklisto, beno ke kuzwa fuku ya ba-dollar mpe beno ke kuma muntu ya bimvwama.” Mu ke na kusila beno kima ve.

Mu ke na kusila beno yayi, kima kaka yina mu lenda sila beno, mpulusu ya Yandi. Lemvo ya Yandi kele ya kulunga samu na konso kumekama. Bantu na Pantekote, ba zolaka kwandi ve yina bawu kuzwaka. Ntangu yayi kuzonzila na bantu ya mafuku ya mbongo? Bawu zolaka ve yina bawu kuzwaka, Mpangi ya kento Angie.

<sup>164</sup> Mu ke zola kuwa nge na Gertie kuyimba, mosi ya bilumbu yayi, (wapi kisika yandi kele?), *Sabala Ya Kuvutuka Na Yinzo*, mosi ya bilumbu yayi. Mingi ya bawu sabukaka yimeni ntama ndilu. Oh, la la!

Ba lombaka ve bima ya nene. Ba lombaka ve mbongo. Beto tala, Pierre tubaka, “Mbongo mpe wolo kele na munu ve, kasi yina kele na munu, mu ke pesa yawu na nge.”

Mpe mu ke tuba yawu na nkokila yayi, bankundi. Kyese, zola, kivuvu, yina kele na munu na Klisto mpe mvumbukulu ya lufwa ya Yandi, yina kele na munu, mu me pesa beno yawu; mu me pesa beno yawu, mutindu bana ya Nzambi.

Mpe beno kwiza mpe beno vwanda na kulunsi kana Nzambi bokilaka beno, mpe beno telama ve. Ntangu beno ke kwiza mbasi na nkokila, beno kwiza to na kukota awa to kuvwanda tii ya ke manisa; to beno belama mpe beto ke sambila mpe ke tentika maboko na zulu ya beno. Beno kwenda . . . Ya kele musiku ya Biblia, beno tentika bawu maboko samu na Mpeve-Santu. Mpe na manima beto ke kwenda, beno ke kwenda na yinzo ya beno . . . Kana beno vwanda kaka kuna, kana beno vwanda mpimpa nyonso, beno vwanda kilumbu ke landa, beno vwanda kilumbu ke landa, beno vwanda ntangu nyonso ya bakonze, beno vwanda tii kilumbu ya ntete ya mvula, ti beno vwanda dyaka, beno vwanda tii.

<sup>165</sup> Ti, nyonso yina beto ke longa samu na mbasi na nkokila, na kulakisaka beno na Biblia yina fwana kwiza, ke kwiza. Mpe ntangu Yawu ke kwiza, kuna ya kele na bampeve ya yimbi mingi ve na kisika ya kukwamisa . . . Beno zaba beno me luta lufwa na Luzingu. Beno kele kivangu ya mona na kati ya Klisto Yesu. Bangunga ya kyese ya Mazulu ke wakana.

<sup>166</sup> Mpangi Othal, mu ke tuba na nge, ya ke tula nge kaka na kati ya tiya. Awa kele bakala ya kukula ya kuvwanda awa, mpangi

ya munu ya bakala ya ntama, yandi vwandaka bandi yina vwanda tambulaka na minduki na luketo ya yandi, na kusosaka muntu na nsongi ya nzila, muntu ya kukubula ditonzo. Mpe yinki kusalamaka? Kilumbu mosi yandi talaka mpe kwikilaka na Luzingu. Mpe yandi me landila na kutambula. Yandi vwanda landa balukutakanu ya munu. Mpe muntu ya mawa, na mingi ve ya kudya, mpe vwanda tandama na kulala na matiti na lweka ya tenta, na nsatu mpe mpwila. Mpe kilumbu mosi Mpeve-Santu me kwiza. Oh, mpangi ya munu ya bakala, ya me sobisa nge, ve? Yawu me nata Luzingu, mpe me nata lufwa ntama. Kuyina me kwenda, mpe zola me kota. Oh, la la! Kintantu mpe kuswana nyonso me kwenda; Luzingu ya mona me kota.

Beno tala awa bayankaka na bayankaka, bayankaka na bayankaka, mpe bisika nyonso kuna. Oh, bangunga ya kyese ya Mazulu ke wakana! Bankundi, ya kele na ata mutindu ve samu mu lakisa yawu.

<sup>167</sup> Beno kuwa, ti mu lenda bika yayi, kana beno me kwikila na kimbangi ya munu, mutindu kisadi ya Klisto, mpe mu me meka na kulakisa beno landila Biblia ya Nzambi ti ya kele kieleka. Mpe kana bampova ya munu ke monana mutindu ti ba lendaka vwanda kaka mwa mutindu yankaka samu na yayi, beno tala na foto yayi na yinza ya mayele ya luzabu ya yinza. Beno tala mbote mbuma, yina Dikunzi ya Tiya yayi yina twadisaka Bana ya Israël, beno tala mbote mbuma yina Yawu basisaka. Beno mona yinki Yawu salaka, yinki Yawu tubaka.

Ya kele munu ve yina ke zonza; ya kele Yandi yina ke zonza na nzila ya munu, beno me mona. Ya kele munu ve yina ke monaka vision; ya kele Yandi yina ke zonzaka na nzila ya beno. Ya kele munu ve yina ke belusaka mbevo; ya kele Yandi yina kele na kati ya beno, ke belusaka mbevo. Ya kele munu ve yina ke longaka; mu kele nsusu ya kupola maza, mpe mu ke kima kaka na kubanza, kasi ya kele Yandi yina ke zonzaka na kulutilaka. Mu zaba Ndinga ve; kasi Yandi zaba Yawu. Kaka yina. Kaka yina. Ya kele yina ya kele.

Mpe Yandi yayi. Mpe Wanzio mosi yango ya Nzambi kele kaka awa na kati ya yinzo yayi na nkokila yayi. [Mpangi Branham me konkota na zulu ya chaire—Mu.] Oh, mutindu mu zola Yandi!

<sup>168</sup> Ntangu yayi bantu yikwa zola kuzwa Mpeve-Santu? Beto tala mbote baluzingu ya beto. Bantu yikwa me kuzwaka Yawu ve, mpe zola kuzwa? Beno telemisa diboko ya beno, beno tuba, “Mpangi Branham, na yisi ya ntima ya munu, mu zola kuzwa Mpeve-Santu.” Nzambi kusakumuna beno, bisika nyonso.

<sup>169</sup> Bantu yikwa ya beno yina me kuzwaka Yawu, mpe ke zola kukwenda mutindu ba salaka na Actes 4, mpe kutuba, “O Mfumu, O Mfumu, tandula diboko ya Nge samu na kubelusa, mpe lakisa bidimbu mpe mambu ya ngitukulu na Nkumbu ya



Mwana ya Nge ya santu Yesu, mpe pesa munu kibakala nyonso mpe zola, na kuzonza, mpe kufuluka ya malu-malu”? Yinga, awa kele ya munu, mpe. Nzambi, pesa Yawu na munu.

Beto kulumusaa bayintu ya beto, na kusungama nyonso, muntu nyonso na kubumbaka nsatu ya yandi na kati ya ntima ya yandi.

<sup>170</sup> Mfumu Yesu, beto me sukisa mwa kuvukana ya nkokila yayi, na manima ya kubundana pene-pene ya Ndinga mpe Mpeve-Santu. Mutindu Yandi me sakumuna beto mpe me tsyamuna na kati ya bantima ya beto mafuta ya Ndinga ya Yandi! Ya kele na milongi, ya kele na bantu awa yina vwandaka zinga mutindu nyonso ya luzingu, ba me meka mpe me mona Mfumu mbote. Beto zaba yinki Mpeve-Santu kele ntangu yayi, nsilulu ya Nzambi. Yawu kele Luzingu ya Seko samu na bayina ke kwikila.

<sup>171</sup> Mpe beto zaba ti Mpeve-Santu vwandaka Mpeve ya Yesu Klisto yina ba me fidisa dyaka, mpe Yandi kele na kati ya beto bubu yayi. Mutindu Nzambi vwandaka na zulu ya beto, na Dikunzi ya Tiya; na manima Yandi me tambula na beto, na kati. . .nzutu yina ba vwanda bokila *Emmanuel*, “Nzambi na beto”; mpe ntangu yayi Yandi kele na kati ya beto, na nzila ya Mpeve-Santu, Nzambi na kati ya beto. Oh!

Yesu tubaka, “Na kilumbu yina beno ke zaba ti Mu kele na kati ya Tata, mpe beno na kati ya Munu, mpe Mu kele na kati ya beno. Beno ke bakula yawu kilumbu yina. Samu ti, beno kele na kati ya yinza ya mpimpa, mutindu ya kutuba, ya bubu yayi, kasi na kilumbu yango beno ke bakula.”

<sup>172</sup> Tata, beto lenda ve kukumisa yawu pwelele mpe ya kulunga, samu ti dyaka beto vwandaka ve na kima ya kuzwa lukwikilu. Kasi bisalu nyonso ya Nzambi kele ya kutwadisa na nzila ya lukwikilu. Mpe na nzila ya lukwikilu na Ndinga ya Nge, na kimbangi ya Mpeve-Santu yina beto zaba kele ntangu yayi, mu ke lombi ti konso moyo ya nsatu na kati awa kuvwanda ya kufuluka na Mpeve-Santu. Ti bayina ntete me kuzwa Yawu ve, mpe ti kele na nsatu ya Yawu, ti bawu kubambuka kaka moyo. . . Beto ke tuba na bawu, Mfumu, mutindu yayi yina Nge tubaka, “Kyese na beno ntangu beno ke vwanda na nsatu mpe mpwila. Beno ke vwanda ya kufuluka.” Ya kele nsilulu. Mpe ya kele kwandi kyese na kuvwanda na nsatu. Beno kele ya kusakumuna na kuzabaka kaka ti Nzambi me zonza na beno, samu ti Yawu tubaka, “Muntu ve lenda kwiza na Munu kana ti Tata ya Munu kubenda yandi ntete.”

<sup>173</sup> Mpe, Mfumu, bawu yina kele basoda ya ntama awa, ba me telemisa maboko ya bawu. Mu telemisaka ya munu. O Mfumu, pesa beto ngolo, pesa beto Ngolo ya kutandula diboko ya Mwana ya Nge ya santu Yesu, ti bidimbu mpe mambu ya ngitukulu kusalama, ti kusalu ya kieleka kuvwanda, kima ya kulutula nene kuluta yina kusalamaka ntete. Pesa beto kibakala mpe zola,

samu na kuzonza na bantu. Pesa yawu, Mfumu. Vwanda na beto na bima nyonso, beto me lombana Nkumbu ya Yesu.

<sup>174</sup> Mpe mbasi na nkokila, Mfumu, ti ya kwiza mutindu mupepe ya ngolo, kubwa na kati ya yinzo yayi, ti ya ke vwanda kaka mutindu Kilumbu yankaka ya Pentecote. Fondasio me kutulama. Nyonso kele ya kuyilama. Ba me kufwa bangombe, ba me kufwa bana ya bangombe ya mafuta, ba me kufwa bankombo ya babakala; mesa me yilama, ba ke na kubokila bayina ba bokilaka. O Mfumu, fidisa mukumbu ya Pentecote, mbasi na nkokila, na kati ya yinzo yayi, mpe fulusa konso moyo na mbotika ya Mpeve-Santu. Pesa yawu, Tata. Beto me lombana yawu na Nkumbu ya Yesu. Amen.

. . . beto ke longuka bima mingi,  
 Beto ke kuzwa nsambi yina kele ya kusala na wolo, mu banza ya funda ya basinga;  
 Beto ke yimba mpe ke boka mpe ke bina,  
 Mwana-dimeme ke kawusa masanga ya beto;  
 Beto ke kuzwa mosi ya lumi- . . . lumingu ya nkembo na kuvutuka na yinzo, mafunda kumi ya bamvula ya ntete. Amen!

Menga ya ntalu ya Mwana ya Yandi Mosi  
 Nzambi me sukula mpe me santisa  
 Bantu ya kuyituka samu na Nkumbu ya Yandi mpe ba ke bokila bawu Kento ya dikwela.  
 Awa kele ya kubika mpe ya kuyina, kilumbu mosi Mfumu ke nata  
 Bayina ya kusoola na mwelo, mpe ya kele luvalu . . .



*SAMU NA YINKI MPEVE-SANTU KUPESAMAKA?* KNG59-1217

(What Was The Holy Ghost Given For?)

BANDANDANI YA MPEVE-SANTU

Nsangu yayi ya Mpangi William Marrion Branham, kulongamaka na Kingelesi, na Kilumbu ya yiya na nkokila, na kilumbu ya 17 ya Ngonda ya kumi na zole, na mvula 1959, na Branham Tabernacle, na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)